

**MESYUARAT KETIGA, PENGGAL KEDUA
PARLIMEN KEEMPAT BELAS**

2019

HARI RABU : 6 NOVEMBER 2019

**PEMBERITAHUAN PERTANYAAN JAWAB LISAN
MESYUARAT KETIGA, PENGGAL KEDUA,
PARLIMEN EMPAT BELAS DEWAN RAKYAT**

PERTANYAAN : JAWAB LISAN

DARIPADA : YB PUAN SU KEONG SIONG (KAMPAR)

TARIKH : 6 NOVEMBER 2019

SOALAN

TUAN SU KEONG SIONG [KAMPAR] minta **MENTERI DALAM NEGERI** menyatakan perancangan bagi memperluas bidang kuasa dan memperkasakan Agensi Anti Dadah Kebangsaan (AADK) memandangkan faktor bahawa AADK memainkan peranan penting dalam usaha membasmi penagih dadah.

JAWAPAN

Terima kasih Tuan Yang di-Pertua.

Terima kasih Yang Berhormat Kampar.

Tuan Yang di-Pertua, untuk makluman Yang Berhormat dan Dewan yang mulia ini, Agensi Antidadah Kebangsaan ataupun AADK merupakan agensi utama dalam usaha membasmi gejala penagihan dadah.

AADK mempunyai peranan yang amat penting dan oleh itu langkah-langkah berikut telah diambil untuk memperkasakan Agensi Antidadah Kebangsaan.

Pertama, Dasar Dadah Negara baru yang diluluskan pada tahun 2017 telah memperkasakan hala tuju Agensi Antidadah Kebangsaan dalam mewujudkan negara dan masyarakat Malaysia yang bebas daripada ancaman gejala dadah. Terdapat lima teras dalam Dasar Dadah Negara ini iaitu teras pendidikan dan pencegahan, teras rawatan dan pemulihan, teras penguatkuasaan, teras pengurangan kemudaratan dan juga teras kerjasama antarabangsa.

SOALAN NO : 1

Kedua, mempertingkatkan keberkesanan pengurusan AADK dengan memberi peruntukan tambahan dan pengisian jawatan. Pada tahun 2020 Tuan Yang di-Pertua, peruntukan belanja mengurus AADK telah meningkat sebanyak 15 peratus dari tahun 2019. Sebanyak 173 perjawatan juga telah diluluskan pengisian oleh Jabatan Perkhidmatan Awam pada tahun ini.

Ketiga, pemerkasaan undang-undang melalui kajian pindaan Akta Penagihan Dadah, Rawatan dan Pemulihan Tahun 1983 bagi meningkatkan pelaksanaan program rawatan dan pemulihian kepada penyalahgunaan dadah dan menggubal Rang Undang-undang Bahan Khayal, Rawatan dan Pemulihan bagi merawat mereka yang menyalah guna bahan khayal seperti gam.

Kerajaan sedar bahawa dalam menangani masalah dadah, AADK tidak mampu bergerak sendirian. Oleh itu tanggungjawab membasmi gejala penagihan dadah di peringkat komuniti harus dipikul bersama oleh NGO sektor swasta dan masyarakat setempat.

Dalam hal ini, Agensi Antidadah Kebangsaan mempunyai peranan utama sebagai penggerak komuniti melalui langkah-langkah seperti berikut:

- (i) Mempergiatkan aktiviti pencegahan dadah dengan kolaborasi antara agensi melalui Projek Rintis Agensi Antidadah Kebangsaan. Untuk makluman, projek rintis ini melibatkan sembilan kementerian dan 15 agensi dan jabatan. Untuk Kementerian Dalam Negeri sahaja terdapat lima agensi yang terlibat dalam projek rintis ini. Selaras dengan usaha kerajaan untuk membangunkan komuniti melalui penglibatan badan bukan kerajaan, kerajaan telah bersetuju untuk memperuntukkan sejumlah RM15 juta bagi melaksanakan Projek Rintis AADK pada tahun 2020; dan
- (ii) Memperkemaskan keberhasilan program pemulihan dengan memberi fokus kepada 178 kawasan berisiko tinggi penagihan dadah dengan menggerakkan komuniti bagi menjalankan program pencegahan bersama-sama dengan Agensi Antidadah Kebangsaan.

Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI IR. DR. WEE KA SIONG
[AYER HITAM]**

TARIKH : 6.11.2019 (RABU)

SOALAN NO. 2

minta **MENTERI PERDAGANGAN DALAM NEGERI DAN HAL EHWAL
PENGGUNA** menyatakan

- (a) bagaimana Kerajaan mengekang monopoli dalam penggunaan kad pembayaran elektronik Touch n' Go memandangkan caj tambahan 10% dikenakan di tempat letak kereta dan RM0.50 bagi setiap kali tambah nilai?; dan
- (b) apakah langkah Kerajaan dalam memantau aktiviti pembayaran elektronik atau bebas tunai serta mengawal caj yang dikenakan ke atas pengguna .

JAWAPAN

Yang di-Pertua,

1. Suruhanjaya Persaingan Malaysia (MyCC) adalah sebuah agensi di bawah Kementerian Perdagangan Dalam Negeri dan Hal Ehwal Pengguna (KPDNHEP) yang dipertanggungjawabkan untuk menguatkuaskan Akta Persaingan 2010. Mengikut undang-undang sedia ada di bawah Seksyen 10 Akta Persaingan 2010, hanya penyalahgunaan kedudukan monopoli yang dikategorikan sebagai satu kesalahan anti-kompetitif kerana menghalang kemasukan pemain lain di dalam pasaran. Memiliki kedudukan dominan mahupun monopoli di mana-mana pasaran tidak menyalahi mana-mana undang-undang sedia ada.
2. MyCC mendapati caj tambahan sebanyak 10% adalah caj yang dikenakan hanya di tempat di mana perkhidmatan pembayaran tiket menggunakan Touch 'n Go dan tunai disediakan pada masa yang sama. Khidmat Touch 'n Go dalam situasi ini dilihat sebagai pemudah cara kepada alternatif menggunakan tunai. Ini bermaksud pengguna diberi pilihan sama ada untuk menggunakan Touch 'n Go sebagai kaedah pembayaran ataupun tidak. Di kawasan tempat kereta yang hanya terdapat infrastruktur Touch 'n Go sebagai kaedah pembayaran, tiada caj tambahan akan dikenakan.
3. Walau bagaimanapun, Touch 'n Go telah menjalankan inisiatif di mana Touch 'n Go akan memastikan semua kontrak baru atau pembaharuan kontrak pada masa akan datang tidak mengenakan sebarang surc妖 yang berdasarkan merchant discount rate (MDR). Manakala kontrak sedia ada yang berdasarkan surc妖 akan tamat tempoh secara berperingkat.

NO SOALAN : 2

4. Touch ‘n Go telah menyediakan sebanyak 11,168 lokasi tambah nilai di seluruh negara. Tambah nilai tanpa apa-apa bayaran boleh dilakukan di beberapa lokasi seperti di kaunter khidmat pelanggan Touch ‘n Go, di TNG Spot dan di kedai runcit seperti Watsons, Guardian, Tesco, KK Mart dan Caring Pharmacy. Terpulang juga kepada pengguna untuk melakukan tambah nilai di lokasi yang mengenakan caj tambahan sebanyak RM0.50.
5. Antara lokasi-lokasinya bagi transaksi terbabit adalah pasaraya, kedai runcit dan mesin ATM. Walaubagaimanapun, caj tambahan ini tidak dikenakan oleh Touch ‘n Go tetapi dikenakan oleh kedai-kedai yang menyediakan kemudahan tambah nilai ini kepada pengguna.
6. Semua pengeluar wang elektronik yang telah mendapat kelulusan dari Bank Negara Malaysia (BNM) di bawah Akta Perkhidmatan Kewangan 2013 (APK) dan Akta Perkhidmatan Kewangan Islam 2013 (APKI) tertakluk kepada standard dan garis panduan sedia ada yang dikeluarkan di bawah APK/APKI. BNM menyelia dan memantau semua pengeluar wang elektronik yang telah mendapat kelulusan BNM, khususnya dari aspek berikut:
 - a. Kepatuhan kepada keperluan untuk mengekalkan akaun amanah;
 - b. Kepatuhan kepada keperluan keselamatan teknologi maklumat;
 - c. Prosedur untuk pengurusan aduan;
 - d. Kepatuhan kepada keperluan untuk saling kendalian (interoperability¹) ; dan
 - e. Kepatuhan kepada Akta Pencegahan Pengubahan Wang Haram dan Pencegahan Pembiayaan Keganasan.

NO SOALAN : 2

7. Dalam mengenakan fi ke atas produk dan perkhidmatan yang ditawarkan, pengeluar wang elektronik dikehendaki untuk mematuhi beberapa prinsip panduan yang dikeluarkan oleh BNM, termasuklah mengenakan fi berdasarkan kos langsung sebenar yang ditanggung oleh pihak pengeluar wang elektronik dan menyediakan pendedahan serta notis yang mencukupi kepada pelanggan berhubung fi yang dikenakan. Secara amnya peniaga tidak sewajarnya mengenakan surcaj terhadap pengguna untuk transaksi pembayaran elektronik dan pengguna boleh melaporkan aduan tentang peniaga yang ingkar kepada pihak pengeluar wang elektronik sekiranya mereka dikenakan caj tersebut oleh pihak peniaga.
8. Kerajaan juga berpendapat bahawa Touch 'n Go bukahlah suatu monopoli dalam pasaran duit elektronik kerana terdapat pemain-pemain lain seperti MCash, Boost, GrabPay dan AliPay. Senarai pemegang lesen duit elektronik yang juga pemain-pemain industri juga disenaraikan di laman web Bank Negara Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN AHMAD BIN HASSAN [PAPAR]

TARIKH : 6 NOVEMBER 2019 (RABU)

SOALAN

Minta **MENTERI PERTANIAN DAN INDUSTRI ASAS TANI** menyatakan berapa banyak tindakan yang telah diambil terhadap nelayan-nelayan yang menggunakan bom ikan untuk menangkap ikan di laut.

JAWAPAN

Yang di-Pertua,

1. Untuk makluman Ahli Yang Berhormat, penggunaan bahan letupan untuk menangkap ikan di laut boleh memusnahkan batu-batu karang yang merupakan habitat tempat ikan berteduh dan membiak. Kegiatan haram ini termasuk dalam salah satu aktiviti *Illegal, Unreported and Unregulated Fishing (IUU fishing)* yang sangat destruktif dan menjelaskan sumber perikanan. Malahan, ianya boleh mendatangkan kecederaan atau membawa kematian kepada pelakunya.
2. Merujuk Seksyen 26 Akta Perikanan 1985, kaedah menangkap ikan menggunakan ‘bom ikan’ yang disebut sebagai ‘bahan letupan’ merupakan satu kesalahan yang boleh dikenakan denda tidak melebihi RM20,000 atau penjara selama tempoh tidak melebihi 2 tahun atau kedua-duanya.
3. Sejak tahun 2014 sehingga 2019, sebanyak 239 kes tangkapan bom ikan telah direkodkan. Daripada jumlah tersebut, sebanyak 36 kes telah didakwa di mahkamah.
4. Bagi mengekang aktiviti penangkapan ikan menggunakan bom ikan, Kementerian secara berterusan mengadakan sesi libat urus bersama nelayan setempat untuk meningkatkan kesedaran mengenai kesalahan dan risiko keselamatan kegiatan ini. Operasi penguatkuasaan juga akan ditingkatkan melalui kerjasama Agensi Penguatkuasaan Maritim Malaysia, Pasukan Polis Marin dan Polis DiRaja Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI HAJAH NANCY SHUKRI
[BATANG SADONG]**

TARIKH : 6 NOVEMBER 2019 (RABU)

SOALAN NO. 4

Minta **MENTERI PENDIDIKAN** menyatakan adakah Sarawak telah mencapai sasaran 90% guru kelahiran Sarawak dan jika tidak, berapa jumlah permohonan guru untuk kembali ke Sarawak yang masih di dalam proses.

JAWAPAN

Tuan Yang di-Pertua,

Untuk makluman Ahli Yang Berhormat, data pada 5 September 2019 menunjukkan bahawa pengisian keperluan guru di negeri Sarawak adalah seramai tiga puluh lapan ribu dua ratus lapan puluh sembilan (38,289) orang. Manakala bilangan guru kelahiran negeri Sarawak yang mengisi keperluan tersebut adalah seramai tiga puluh empat ribu dua ratus sembilan puluh dua (34,292) orang atau 90 peratus dan telah mencapai sasaran Pelaksanaan Dasar 90:10. Pihak Kementerian telah mencapai sasaran lebih awal daripada tahun 2021 dan kita komited untuk melaksanakan Dasar pengisian jawatan guru oleh anak Sarawak ini.

Bagi pertanyaan tentang jumlah permohonan guru untuk kembali ke Sarawak, permohonan pertukaran guru ke negeri Sarawak yang akan dipertimbangkan bagi sesi pertukaran Januari 2020 adalah seramai 55 orang bagi sekolah menengah dan seramai 333 orang bagi sekolah rendah. Sekian, terima kasih.

SOALAN NO : 5

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : YB DATO' MOHD FASIAH B. MOHD FAKEH
(SABAK BERNAM)**

TARIKH : 6 NOVEMBER 2019

SOALAN

DATO' HAJI MOHD FASIAH BIN HAJI MOHD FAKEH [SABAK BERNAM] minta **MENTERI DALAM NEGERI** menyatakan jumlah kes penipuan atas talian yang melibatkan simpanan persendirian orang ramai di bank-bank Malaysia bagi tempoh 2019 dan nyatakan jumlahnya serta apakah langkah Kerajaan dan institusi perbankan bagi mengatasi jenayah ini supaya tidak berterusan dan merugikan penyimpan-penyimpan di bank-bank negara ini.

JAWAPAN

Tuan Yang diPertua,

Izinkan saya menjawab soalan ini secara bersekali dengan satu soalan lain yang turut membincangkan isu sama iaitu berkenaan dengan penipuan atau telecommunication fraud atau Macau scam oleh Yang Berhormat Tanah Merah bertarikh 27 November 2019.

Tuan Yang di-Pertua, Kementerian Dalam Negeri memandang serius berhubung keskes yang melibatkan jenayah penipuan atas talian yang meliputi pelbagai kategori seperti penipuan melalui telefon dan Internet, love scam, pinjaman tidak wujud dan juga Macau scam. Untuk makluman Ahli Yang Berhormat, jumlah kes penipuan atas talian yang dilaporkan di seluruh negara bagi tahun 2018 adalah sebanyak 4,956 kes dengan melibatkan jumlah kerugian sebanyak RM224,653,895.18.

Manakala bagi tempoh Januari hingga Ogos 2019, sebanyak 3,533 kes direkodkan dengan jumlah kerugian sebanyak RM186,027,122.72. Daripada jumlah kerugian yang dilaporkan bagi tahun 2019 tersebut, sebanyak RM79,483,843.43 kerugian adalah melibatkan Macau scam sahaja dengan 1,612 kes telah dilaporkan.

Bagi mengekang jenayah penipuan atas talian ini daripada terus berleluasa, pelbagai usaha telah dijalankan oleh PDRM dalam mengekang sindiket penipuan seperti ini termasuklah dengan meningkatkan penguatkuasaan undang-undang, pengoperasian, tangkapan dan seterusnya menjalankan pendakwaan ke atas mereka yang terlibat dalam penipuan ini.

PDRM juga sering mengadakan taklimat, ceramah dan dialog kepada kakitangan kerajaan, syarikat-syarikat swasta, persatuan-persatuan, sekolah, universiti dan NGO mengenai modus operandi sindiket jenayah penipuan ini termasuk jugalah kadang-kadang Tuan Yang diPertua, PDRM ada menganjurkan pameran-pameran di kompleks-kompleks membeli-belah. Ini di antara usaha-usaha kita untuk memberikan pendidikan ataupun penerangan kepada orang awam agar jangan mudah terpedaya dengan sindiket dan penipuan ini.

SOALAN NO : 5

Selain itu juga Tuan Yang di-Pertua, kempen kesedaran juga dibuat melalui pameran-pameran di kompleks-kompleks yang telah saya sebutkan tadi. Pihak PDRM juga telah membangunkan satu portal untuk memudahkan masyarakat untuk menyemak nombor-nombor telefon sindiket dan akaun-akaun bank yang digunakan oleh sindiket dalam urusan pindahan wang mangsa ke akaun sindiket yang boleh disemak melalui portal yang disediakan <http://ccid.rmp.gov.my/semakmule>.

Selain itu, satu akaun Facebook Cyber Crime Alert Royal Malaysia Police juga telah diwujudkan bagi berkongsi dan memberi amaran kepada orang ramai mengenai ancaman penipuan ataupun jenayah siber. Ini dapat membantu orang awam dengan membuat semakan awal dan mengelak daripada menjadi mangsa penipuan.

PDRM juga telah menubuhkan satu taskforce yang dinamakan internet banking task force group yang terdiri daripada PDRM, syarikat-syarikat telekomunikasi serta institusi-institusi bank tempatan. Pada bulan Mac 2019, sebuah Jawatankuasa Teknikal Jenayah Siber yang terdiri daripada PDRM dan Kementerian Komunikasi dan Multimedia Malaysia juga telah ditubuhkan bagi membanteras jenayah penipuan ini.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI RICHARD RIOT ANAK JAEM
(SERIAN)**

TARIKH : 6 NOVEMBER 2019 (RABU)

SOALAN

Minta **MENTERI PERTAHANAN** menyatakan apakah status terkini tentang kehilangan dua orang askar semasa operasi di Pulau Perak, Kedah pada bulan Julai tahun ini.

JAWAPAN

Tuan Yang di Pertua,

Operasi CARILAMAT bagi pencarian dua anggota Tentera Darat telah diaktifkan oleh Maritime Rescue Sub-Centre (MRSC) Langkawi pada 20 Julai 2019, jam 7.30 pagi. Sebuah kapal Tentera Laut Diraja Malaysia (TLDM) dan sebuah kapal Agensi Penguatkuasa Maritim Malaysia (APMM) telah terlibat di dalam operasi berkenaan. Operasi CARILAMAT turut dibantu oleh sebuah pesawat Nuri Tentera Udara Diraja Malaysia (TUDM) dan sebuah pesawat Dauphin APMM.

Pada 21 Julai 2019, jam 7.30 malam, MRSC Langkawi telah menamatkan Operasi CARILAMAT bagi aset APMM berikutan tiada sebarang petunjuk dijumpai. Walau bagaimanapun aset TLDM masih meneruskan pencarian di sekitar perairan Pulau Perak. Kawasan pencarian tertumpu di bahagian Timur Laut, Pulau Perak. Pada 26 Julai 2019, jam 4.45 petang, setelah seminggu pencarian dilakukan, Operasi CARILAMAT melibatkan aset TLDM telah dihentikan berikutan tiada petunjuk baru. Operasi CARILAMAT akan disambung semula jika terdapat petunjuk baru. Walau bagaimanapun, aset ATM sentiasa melaksanakan pemantauan di kawasan tersebut bagi mendapatkan sebarang petunjuk baru.

**PEMBERITAHUAN PERTANYAAN LISAN
MESYUARAT KETIGA DEWAN RAKYAT, PENGGAL KEDUA
PARLIMEN KEEMPAT BELAS**

PERTANYAAN : JAWAB LISAN

**DARIPADA : DATUK HAJAH AZIZAH BINTI DATUK SERI
PANGLIMA HAJI MOHD DUN [BEAUFORT]**

TARIKH : 6 NOVEMBER 2019 (RABU)

SOALAN

Datuk Hajah Azizah binti Datuk Seri Panglima Haji Mohd Dun [Beaufort] minta MENTERI PEMBANGUNAN WANITA, KELUARGA DAN MASYARAKAT menyatakan apakah inisiatif-inisiatif baharu Kementerian bagi memperkasa kebajikan warga emas di Malaysia.

JAWAPAN:

Tuan Yang di-Pertua,

Negara kita akan mencapai status negara tua menjelang tahun 2030 apabila dianggarkan penduduk berumur 60 tahun dan ke atas adalah 15.3 peratus daripada jumlah keseluruhan penduduk. Dasar dan Pelan Tindakan Warga Emas Negara (PTWEN) 2011–2020 sedia ada masih dilaksanakan malah dipertingkatkan dari semasa ke semasa. Platform tertinggi yang diperuntukkan di bawah dasar ini merupakan Majlis Penasihat dan Perundingan Warga Emas Negara (MPPWEN) yang mana semua isu-isu semasa berkaitan warga emas boleh dibawa untuk perbincangan lanjut oleh semua agensi Kerajaan, Pertubuhan Bukan Kerajaan serta individu yang berkaitan.

Inisiatif kebijakan sedia ada yang dilaksanakan oleh Kementerian antara lain adalah Bantuan Orang Tua (BOT) berjumlah RM350 sebulan kepada warga emas yang layak, serta menyediakan institusi kebijakan iaitu Rumah Seri Kenangan dan Rumah Ehsan untuk menjaga golongan warga emas yang uzur, daif dan tidak mempunyai waris.

Dalam usaha mempertingkatkan perlindungan dan hak asasi warga emas, Kementerian sedang melaksanakan Kajian Kandungan, Pendekatan dan Skop bagi Pewujudan Satu Akta Khusus untuk Warga Emas di Malaysia. Akta ini juga bertujuan untuk mewujudkan sistem sokongan kukuh kepada warga emas dan penjaga atau keluarga yang terlibat. Draf RUU warga emas dijangka akan siap pada penghujung tahun 2020.

Cadangan pewujudan akta ini adalah selaras dengan hasil Kajian Morbiditi dan Kesihatan Kebangsaan yang dilaksanakan oleh Kementerian Kesihatan dan Kajian, dengan izin, *Prevent Elder Abuse and Neglect Initiative (PEACE)* yang dilaksanakan oleh Universiti Malaya telah menunjukkan hasil kajian yang hampir sama iaitu prevalens atau kekerapan penderaan warga emas di Malaysia adalah lebih kurang 10%. Penggubalan akta ini bertujuan agar promosi dan perlindungan hak asasi warga emas dapat di perkasa dan seterusnya dapat meningkatkan kesejahteraan warga emas.

Kementerian juga sedang dalam tindakan untuk mewujudkan model penjagaan jangka masa panjang warga emas melalui Kajian Diagnostik Bagi Membentuk Model Penjagaan Warga Emas Jangka Masa Panjang Yang Bersepadu dan Mampan di Malaysia. Kajian yang dijangka akan selesai pada penghujung tahun 2020 akan mengambil kira keperluan jagaan kesihatan dan sosial di institusi serta di dalam komuniti. Skop kesejahteraan dan kebajikan golongan warga emas serta penjaga akan dititikberatkan dalam kajian ini. Hasil kajian ini dijangka antara lain akan meliputi pembentukan model pembiayaan mampan serta pelan tindakan pelaksanaan penjagaan jangka masa panjang termasuk keperluan modal insan.

Seterusnya, KPKWM melalui kolaborasi dengan Kementerian Hal Ehwal Ekonomi dan *United Nations Development Programme* (UNDP) juga akan melaksanakan projek daerah mesra warga emas atau dengan izin *age-friendly city* melalui projek rintis di Taiping, Perak. Projek rintis selama dua (2) tahun ini akan dijalankan berdasarkan panduan *age-friendly city* daripada *World Health Organisation* (WHO). Satu kerangka kerja bagi pewujudan daerah mesra warga emas ini akan dihasilkan yang mana boleh diguna pakai oleh pihak berkuasa tempatan lain kelak. YAB Timbalan Perdana Menteri telah merasmikan Pelancaran Projek Rintis *Age-Friendly City @Taiping* pada 30 Oktober 2019.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : YB DATUK HJ. JALALUDDIN B. HJ. ALIAS
(JELEBU)**

TARIKH : 6 NOVEMBER 2019

SOALAN

DATO' HAJI JALALUDDIN BIN HAJI ALIAS [JELEBU] minta **MENTERI DALAM NEGERI** menyatakan adakah terdapat sebarang kemasukan dalam skala besar rakyat Hong Kong ke Malaysia selepas krisis yang berlaku di negara mereka.

JAWAPAN

Tuan Yang di-Pertua,

Berdasarkan rekod oleh Jabatan Imigresen Malaysia, jumlah ketibaan warganegara Hong Kong ke Malaysia pada tahun 2017 adalah seramai 345 orang, seramai 458 orang pada tahun 2018 dan seramai 242 orang pada tahun 2019 iaitu sehingga 31 Ogos 2019. Melalui trend statistik yang dicatatkan tersebut, jelaslah bahawa tiada peningkatan yang ketara bagi jumlah kemasukan warganegara Hong Kong ke Malaysia walaupun sekarang ini di Hong Kong,

Tuan Yang di-Pertua, berlaku ketidaktentuan dari segi keamanan yang berlaku di sana. Jadi, itulah, saya rasa soalan berbentuk spesifik, jawapan saya pun spesifik. Terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : PUAN NURUL IZZAH BINTI ANWAR
[PERMATANG PAUH]**

TARIKH : 6 NOVEMBER 2019 (RABU)

SOALAN NO: 9

Minta **MENTERI PERTANIAN DAN INDUSTRI ASAS TANI** menyatakan:-

- a. usaha Kementerian melalui Dasar Agromakanan 2.0 dalam menekankan pembangunan infrastruktur dan penggunaan teknologi moden (agroteknologi); dan
- b. usaha Kementerian dalam menggalakkan penglibatan belia luar bandar dalam industri pertanian moden sebagai suatu sumber pendapatan yang mampan dan kukuh.

JAWAPAN

Yang Dipertua,

Merujuk kepada soalan yang pertama (a),

1. Untuk makluman Ahli Yang Berhormat, Kementerian ini sememangnya memberi perhatian dan penekanan tentang kepentingan memodenkan sektor agromakanan melalui pembangunan infrastruktur dan penggunaan teknologi moden (agroteknologi). Pemodenan sektor agromakanan adalah penting dalam meningkatkan produktiviti, mengurangkan kos pengeluaran dan mengurangkan kebergantungan kepada tenaga buruh. Dengan adanya infrastruktur yang lengkap serta

SOALAN NO : 9

teknologi moden yang menyokong hala tuju pemodenan sektor agromakanan, ianya berpotensi menyumbang kepada ekonomi negara.

2. Usaha memodenkan sektor pertanian telah digariskan di dalam Dasar Agromakanan Negara (2011-2020) dan Hala Tuju Kementerian Pertanian dan Industri Asas Tani (MOA) di bawah Prioriti dan Strategi MOA (2019-2020). Usaha untuk meningkatkan penerimaan teknologi dalam kalangan petani merangkumi penyebarluasan penggunaan teknologi pertanian (mekanisasi dan automasi), pembangunan model pertanian moden dan pembangunan pangkalan Data Agromakanan Negara (*Agriculture Flagship*).

3. Sejajar dengan perkembangan teknologi dan Revolusi Industri 4.0, strategi memodenkan amalan pertanian dengan meningkatkan penerimanaan teknologi akan terus diberi penekanan dan akan disusun semula dalam penyediaan rangka DAN 2.0. Justeru, DAN 2.0 akan memberi fokus dalam menangani isu-isu semasa sektor agromakanan yang meliputi produktiviti, kos pengeluaran serta kebergantungan kepada tenaga buruh.

4. Dalam hal ini, penekanan terhadap penggunaan/aplikasi teknologi dalam sektor di bawah DAN 2.0 kelak akan mengambilkira perkara-perkara berikut:

- (i) **Pengintegrasian teknologi pertanian moden yang bersifat 'HI-Tech'** seperti penggunaan robot (agro robotik), penderia, pertanian tepat, penggunaan dron, pembangunan data pertanian (*big analytical data*), aplikasi berdasarkan *Internet of Things* (IoT), model kilang tanaman dan lain-lain;
- (ii) **Penglibatan lebih banyak pihak dari sektor swasta dan pihak industri** bagi membantu golongan petani dalam mempercepatkan pemindahan teknologi moden;
- (iii) **Penambahbaikan modul dan model pembelajaran pertanian pintar** yang dirangka dan disediakan bagi melahirkan dan menyediakan golongan belia tani masa depan (*future agro youth*);

SOALAN NO : 9

- (iv) **Peluasan skop kursus dan latihan berkaitan teknologi moden;**
- (v) **Pemberian bantuan berbentuk insentif** yang bersesuaian kepada para petani seperti pemberian input pertanian, pembangunan infrastruktur ladang dan sebagainya;
- (vi) **Penggalakkan dan pemantapan program penyelidikan di institusi-institusi penyelidikan** bagi membangunkan varieti-varieti baru tanaman yang lebih tahan rintangan (resistance) kepada kesan perubahan iklim sama ada melalui kaedah konvensional mahupun melalui kaedah bioteknologi; dan
- (vii) **Pemerkasaan inovasi dalam penggunaan teknologi** dalam menggiatkan lagi sektor pertanian yang kalis masa depan serta menjamin sekuriti makanan negara.

Merujuk kepada soalan yang kedua (b) pula,

1. Kementerian menyedari penglibatan golongan muda dalam sektor pertanian khususnya para belia masih berada di tahap rendah. Dalam mendepani cabaran ini, Kerajaan telah melaksanakan pelbagai dasar, strategi dan program yang melibatkan golongan belia termasuk belia luar bandar untuk menceburi sektor pertanian.
2. Usaha bagi mempertingkatkan penglibatan golongan belia yang dilaksanakan turut mengambil kira dasar semasa di bawah Kementerian lain seperti Dasar Pembangunan Luar Bandar (DPLB) yang dilancarkan oleh Kementerian Pembangunan Luar Bandar (KPLB). Salah satu strategi DPLB turut menyentuh mengenai galakan kepada golongan belia menceburi sektor pertanian serta peluang pekerjaan yang boleh ditawarkan di luar bandar terutamanya bidang pertanian berteknologi tinggi.
3. Dalam usaha menjadikan sektor pertanian sebagai suatu sumber pendapatan yang mampan dan kukuh, Kementerian ini mempunyai beberapa program yang sedang dijalankan bagi menggalakkan

SOALAN NO : 9

penglibatan belia termasuk belia luar bandar dalam industri pertanian moden seperti berikut:

- i. **Melaksanakan Program Agropreneur Muda** yang menawarkan perkhidmatan dan bantuan seperti berikut:
 - a. Geran Agropreneur Muda (GAM) berbentuk barang sehingga RM20,000 bagi setiap projek;
 - b. Pakej Pembiayaan Khas di bawah TEKUN Nasional sehingga RM50,000 dan di bawah Agrobank sehingga RM200,000 bagi projek pengembangan; dan
 - c. Menyediakan kursus jangka pendek dan khidmat nasihat teknikal dan kewangan melalui jabatan/agensi berkaitan di bawah Kementerian.
- ii. **Menyediakan Skim Pembiayaan Mekanisasi dan Automasi** dengan dana berjumlah RM5.79 juta di bawah Agrobank bagi perolehan peralatan dan sistem mekanisasi dan automasi seperti jentera, traktor dan lain-lain;
- iii. **Menyediakan program latihan jangka pendek dan jangka panjang** untuk melahirkan pekerja mahir dan usahawan pertanian melalui penggunaan teknologi terkini melibatkan belia berumur 18 hingga 40 tahun yang meliputi program-program seperti berikut:
 - a. Sijil Pertanian, Sijil Kemahiran Malaysia
 - b. Inkubator Usahawan Belia Tani
 - c. Keusahawanan Kemahiran Pemprosesan Makanan
 - d. Kelab Usahawan Siswazah Tani (MyAgrosis);
- iv. **Memberikan latihan pemasaran digital kepada usahawan agromakanan** untuk membolehkan mereka memasarkan produk secara cekap dan berkesan di dalam era ekonomi digital;

SOALAN NO : 9

- v. **Melaksanakan kursus dan latihan khas dalam bidang *Internet of Things (IoT)* yang mensasarkan kepada petani-petani moden yang berminat untuk menjalankan penanaman secara kilang tanaman; dan**
- vi. **Menganjurkan program-program penemusuaian antara petani dan syarikat-syarikat teknologi bagi meningkatkan pengetahuan dan mempercepatkan pemindahan teknologi terkini kepada para petani.**

Sekian, terima kasih.

**PEMBERITAHUAN PERTANYAAN JAWAB LISAN
DEWAN RAKYAT MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : JAWAB LISAN

DARIPADA : DATO' SRI ABDUL AZEEZ BIN ABDUL RAHIM [BALING]

TARIKH : 6 NOVEMBER 2019 (RABU)

SOALAN

Dato' Sri Abdul Azeez bin Abdul Rahim [Baling] minta **MENTERI PEMBANGUNAN WANITA, KELUARGA DAN MASYARAKAT** menyatakan sama ada Kementerian bercadang meningkatkan usaha memberikan kesedaran kepada masyarakat khususnya ibu bapa mengenai kesan penderaan emosi dan pengabaian terhadap anak-anak.

JAWAPAN:

Tuan Yang di-Pertua,

Kementerian melalui **Lembaga Penduduk dan Pembangunan Keluarga Negara (LPPKN)** telah melaksanakan program *Smart Parenting* kepada ibu bapa dan masyarakat setempat dalam menangani keselamatan anak. Melalui **Program Pendidikan Keselamatan Keluarga dan Anak (PEKA)** yang diperkenalkan pada tahun 2017, sehingga kini seramai 400 orang fasilitator telah dilatih yang terdiri daripada pelbagai agensi dan NGO. Dari tahun 2017 hingga September 2019, sebanyak 230 program telah dilaksanakan dengan melibatkan seramai 7,910 peserta daripada ibu bapa di peringkat komuniti telah mendapat manfaat.

Selain daripada program PEKA, **Jabatan Kebajikan Masyarakat (JKM)** turut melaksanakan kempen keselamatan kanak-kanak di sekolah dikenali sebagai **Sahabat B.I.J.A.K. : SAFE AND PROTECT**. Kempen ini telah dilancarkan pada Oktober 2014 yang bertujuan untuk menyebar luas maklumat berkaitan aspek keselamatan kanak-kanak termasuk literasi undang-undang kepada kanak-kanak sekolah, ibu, bapa, penjaga, guru-guru serta masyarakat.

Sehingga Julai 2019, seramai 76,229 orang kanak-kanak dan 337 buah sekolah telah mendapat manfaat dari kempen yang dijalankan. Kementerian amat menggalakkan penglibatan Yang Berhormat untuk melaksanakan program seumpama ini di kawasan masing-masing.

Kementerian telah menganjurkan satu Taklimat Modul Cakna Diri Lelaki kepada Ahli-Ahli Yang Berhormat pada 5 November 2019 bertempat di Parlimen Malaysia. Menerusi taklimat tersebut, Ahli-Ahli Yang Berhormat disarankan bekerjasama dengan LPPKN untuk melaksanakan program ini di kawasan masing-masing.

LPPKN turut membangunkan kursus-kursus seperti *Keluarga@Kerja (Parenting@Work)* sejak tahun 2007 bagi membantu ibu bapa menyiapkan diri serta mempertingkatkan pengetahuan dan kemahiran ke

SOALAN NO. : 10

arah melahirkan keluarga yang berilmu. LPPKN juga turut menyediakan perkhidmatan sokongan emosi kepada keluarga dan anak-anak melalui perkhidmatan kaunseling di Pejabat LPPKN Negeri.

LPPKN turut melaksanakan Program Terapi Minda kepada masyarakat di seluruh negara. Program ini membantu peserta mengurus stres demi kesejahteraan diri serta memantapkan personaliti dalam pengurusan emosi. Program ini memberi penekanan kepada kesimbangan antara kognitif, fizikal dan emosi menggunakan kaedah terapi. Bermula tahun 2013 sehingga September 2019 sebanyak 260 program telah dilaksanakan melibatkan seramai 8,647 peserta di seluruh Malaysia.

Sehubungan itu, bagi memanfaatkan 28.7 juta pengguna Internet di Malaysia, fokus Kementerian akan beralih kepada bentuk digital dan *online* untuk *reach out* (dengan izin) masyarakat dan golongan sasar kita pada hari ini. Sebagai contoh perkhidmatan KafeTEEN kepada remaja yang sebelum ini dalam bentuk fizikal telah ditambah baik menjadi digital dalam bentuk *online* yang dinamakan KafeTEEN *Mobile App* dan semenjak November 2018 dilancarkan ia telah memberi manfaat kepada seramai 3,440 pengguna *online* yang menggunakannya. Menyedari penggunaan sistem *online* tinggi di kalangan rakyat Malaysia, bermula tahun 2020 LPPKN akan membangunkan lebih banyak kursus seperti pra perkahwinan *Smart Start* dan kursus keibubapaan secara *online*.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN KESAVAN A/L SUBRAMANIAM
[SUNGAI SIPUT]**

TARIKH : 6 NOVEMBER 2019 (RABU)

SOALAN NO. 11

Minta **MENTERI PENDIDIKAN** menyatakan bilakah kali terakhir Kementerian Pendidikan menjalankan kajian berkenaan kepuasan dan kegembiraan guru-guru dalam menjalankan tugas dan sekiranya ada apakah dapatan kajian tersebut.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia (KPM) sentiasa mengambil berat dan cakna isu kebajikan dan kegembiraan guru-guru. Saya sendiri telah menekankan kepentingan isu ini sejak hari pertama berada di kementerian dan sentiasa komited untuk memastikan ianya berjaya. Izinkan saya untuk mengulang semula penegasan yang pernah saya berikan semasa kali pertama menjawab di Dewan Rakyat pada 18 Julai 2018:

“Kementerian Pendidikan pada era ini, seperti mana yang termaktub dalam Manifesto Pakatan Harapan mempunyai hala tuju yang jelas iaitu untuk memastikan sekolah kebangsaan menjadi sekolah pilihan rakyat. Matlamat ini hanya akan dapat dicapai dengan memberikan tumpuan kepada peningkatan mutu dan kualiti pengajaran dan pembelajaran. Kementerian Pendidikan akan menerapkan tiga (3) nilai utama dalam budaya pengajaran dan pembelajaran iaitu: kegembiraan, kasih sayang, dan saling hormat menghormati. Murid-murid harus berasa gembira untuk hadir ke sekolah dan guru-guru mesti turut berasa berbangga kerana berpeluang mendidik anak-anak bangsa.”

Perkara ini juga turut dimasukkan dalam dalam Amanat Menteri Pendidikan Tahun 2019 yang telah disampaikan kepada semua pengarah Jabatan Pendidikan Negeri pada awal Januari tahun 2019.

Antara inisiatif awal dalam mengembalikan elemen kegembiraan dalam kalangan guru, Kementerian Pendidikan Malaysia (KPM) telah mengambil pelbagai pendekatan secara holistik dalam usaha mencari penyelesaian yang terbaik untuk mengurangkan beban tugas guru dalam melakukan kerja-kerja perkeranian supaya tidak mengganggu tugas hakiki mereka di sekolah. Secara keseluruhannya, beban tugas guru dalam kerja perkeranian dan teknikal ICT adalah bergantung kepada jenis tugas khas yang dipegang oleh guru. Antara langkah yang diambil oleh KPM bagi menangani beban tugas guru ialah:

1. Melaksanakan kerangka baharu norma perjawatan kumpulan pelaksana di sekolah yang responsif terhadap keperluan pentadbiran, perkhidmatan, pengurusan kewangan, stor, dan aset sekolah.
2. Memastikan pengurusan di peringkat kementerian, negeri, daerah dan sekolah memahami dan mematuhi semua pekeliling serta surat siaran berkaitan yang sedang berkuat kuasa.
3. Mengurangkan serta memudahkan tugas kemasukan data atau pelaporan dengan pemerksaan pengintegrasian data melalui inisiatif *single-sign-on* (SSO).

Dalam konteks kesejahteraan psikologi para guru, KPM melalui Kajian Kesejahteraan Psikologi dan Keperluan Perkhidmatan Kaunseling dalam kalangan guru pada April 2019 mendapati wujudnya keperluan untuk isu kesejahteraan psikologi guru diberi perhatian khusus dan sewajarnya. KPM misalnya telah mula menganjurkan Program Meningkatkan Kesedaran Kesejahteraan Psikologi Guru #3A iaitu Sedar (*Aware*), Peka (*Alert*), dan Tindakan (*Action*) untuk warga guru bermula pada Julai 2019 sebagai salah satu inisiatif dalam pelan kesejahteraan psikologi guru-guru di KPM. Selain itu, Kementerian juga menjalankan program atau aktiviti 3Pi (Program Pembangunan, Pencegahan dan Pemulihan serta Intervensi) melibatkan seramai 17,346 orang sejak Januari sehingga September 2019.

Contoh-contoh inisiatif yang telah disebutkan ini hanyalah singkapan usaha-usaha serius pihak Kementerian dalam memastikan guru-guru kembali gembira untuk mengajar di sekolah. Kementerian di masa hadapan akan menjalankan kajian berkenaan kepuasan dan kegembiraan guru-guru dalam menjalankan tugas bagi menilai keberkesanan usaha-usaha yang telah kita jalankan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE DUA,
PARLIMEN EMPATBELAS**

PERTANYAAN : JAWAB LISAN

**DARIPADA : TUAN NIK MOHAMAD ABDUH
BIN NIK ABDUL AZIZ [BACHOK]**

TARIKH : 06 NOVEMBER 2019

SOALAN

TUAN NIK MOHAMAD ABDUH BIN NIK ABDUL AZIZ [BACHOK]
minta **MENTERI DALAM NEGERI** menyatakan sejauh mana keseriusan
kes-kes penculikan kanak-kanak di negara ini serta langkah
mengatasinya.

JAWAPAN

Tuan Yang Dipertua,

Berdasarkan statistik, bagi tahun 2016 hingga bulan Ogos 2019, sebanyak 135 kes penculikan kanak-kanak dilaporkan diseluruh negara. Daripada jumlah tersebut, sebanyak 95 kes telah berjaya diselesaikan manakala sebanyak 40 kes masih lagi dalam siasatan PDRM. Berdasarkan statistik ini juga dapat dilihat penurunan jumlah kes penculikan kanak-kanak yang dilaporkan.

Dakwaan yang menyatakan bahawa jenayah culik terhadap kanak-kanak semakin berleluasa ketika ini adalah tidak benar dan merupakan khabar angin semata-mata. Ia disebarluaskan oleh pihak yang tidak bertanggungjawab di dalam media sosial bertujuan untuk menakut-nakutkan dan menimbulkan persepsi negatif masyarakat terhadap keupayaan Polis Diraja Malaysia (PDRM) dalam menangani masalah jenayah. Kerajaan memandang serius setiap kes kehilangan kanak-kanak yang dilaporkan. Dalam hal ini, pelbagai usaha dan tindakan telah diambil oleh pihak PDRM untuk mengesan kanak-kanak yang hilang antaranya;

SOALAN NO : 12

- i) sebaik sahaja laporan mengenai kehilangan diterima, semua butiran mengenai kehilangan tersebut terutamanya gambar dan maklumat fizikal kanak-kanak tersebut akan disebarluaskan secepat mungkin ke pelbagai saluran termasuklah ke petugas di pintu-pintu masuk untuk memastikan pengesahan awal dan mencegah mereka daripada dibawa keluar negara;
- ii) PDRM akan memuatnaik Portal Kanak-kanak Hilang dilaman sesawang rasmi PDRM mendapatkan bantuan dari orang ramai untuk menyalurkan maklumat mengenai kanak-kanak yang hilang. Maklumat berkenaan dipaparkan di portal <https://knk2hilang.rmp.gov.my> untuk memudahkan lagi penyaluran maklumat mengenai kes kehilangan itu kepada orang ramai bagi mendapatkan bantuan atau maklumat dalam usaha mengesan dan menyelamatkan kanak-kanak yang hilang itu;
- iii) PDRM juga menjalankan kerjasama dengan KPWKM melalui NUR Alert iaitu sistem amaran awal bagi kes kehilangan kanak-kanak untuk membantu agensi penguatkuasa undang-undang dalam menjalankan siasatan dan membawa kepada tangkapan yang pantas. Sistem ini melibatkan kerjasama 39 petugas daripada pelbagai kementerian, jabatan, agensi kerajaan, swasta dan agensi bukan kerajaan (NGO); dan
- iv) PDRM turut mengadakan kerjasama dengan pelbagai pihak dalam pengajuran program-program kesedaran untuk mengelakkan kes ini daripada berulang. Kempen Kesedaran Kanak-Kanak atau Child Awareness Campaign (CAC) bertujuan memberikan kesedaran kepada masyarakat bahawa kanak-kanak mudah terdedah menjadi mangsa dan adalah penting untuk memastikan keselamatan mereka terjamin.

Kementerian menyeru masyarakat agar tidak mudah mempercayai sebarang bentuk khabar angin yang disiarkan di media sosial dan meminta semua pihak mendapatkan maklumat yang sahih yang dikeluarkan oleh pihak berkuasa. Pihak polis tidak akan teragak-agak untuk mengambil tindakan tegas ke atas mana-mana individu atau pihak yang menyebarkan berita-berita yang boleh menimbulkan keresahan dan ketakutan kepada masyarakat.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI SHABUDIN BIN YAHAYA
[TASEK GELUGOR]**

TARIKH : 6 NOVEMBER 2019 (RABU)

SOALAN NO. 13

Minta **MENTERI PENDIDIKAN** menyatakan apakah pelajar-pelajar yang mengikuti modul dan rangka pembelajaran Transformasi Pendidikan Teknikal dan Latihan Vokasional (TVET) menepati pasaran pekerjaan yang ada di negara ini seiring dengan perkembangan teknologi maklumat (IT) dan media sosial. Dan adakah pihak Kementerian bercadang untuk menambah baik sistem pendidikan TVET ini agar pelajar yang benar-benar mahir dalam sektor ini terus diberi pendedahan yang lebih khusus dan menjurus kepada bidang pekerjaan atau perniagaan.

JAWAPAN

Tuan Yang di-Pertua,

Kerajaan sentiasa menambah baik ekosistem pendidikan dan latihan teknikal dan vokasional (TVET) bagi memastikan graduan yang dihasilkan adalah menepati keperluan pasaran terutamanya dalam era Industri 4.0. Penubuhan Jawatankuasa Kabinet Pemerkasaan TVET (JKKPTVET) pada 14 Ogos 2019 sebagai badan penasihat kepada Kerajaan untuk pembangunan aliran TVET negara selain turut membahaskan isu-isu semasa negara berkaitan TVET. Jawatankuasa telah bersetuju dan menetapkan visi TVET negara adalah TVET untuk Tenaga Kerja Berkemahiran Menjelang 2030. Manakala, misi TVET negara adalah Memperkasa Tenaga Kerja dengan Kemahiran Berasaskan Industri untuk Memacu Ekonomi Negara.

Laporan Pelan Pemerkasaan TVET telah menggariskan 20 strategi dan 15 syor pada lima pemacu utama iaitu governan, pembiayaan, Industri, kualiti dan penjenamaan dalam mencapai aspirasi kebangsaan ekosistem TVET dan aspirasi pelajar TVET berkemahiran tinggi. Manakala *Key Performance Indicator* (KPI) utama JKKPTVET ialah Badan Penyelaras TVET Negara, Model Pembiayaan, Model Pemilikan Bersama, Persijilan TVET (Industri) dan Jenama TVET Kebangsaan Tunggal. Usaha ini adalah antara langkah yang dilakukan bagi mencapai sasaran kerajaan untuk melahirkan sebanyak 35 peratus tenaga kerja berkemahiran tinggi menjelang 2020.

Selain itu, perubahan dari segi pemikiran dan persepsi cara bekerja dan budaya adalah melalui fasa penglibatan industri iaitu daripada *industry participation* kepada *industri partnership* seterusnya kepada *industry-led TVET*.

KPM juga bekerjasama dengan industri dalam memastikan kurikulum yang digunakan menepati keperluan industri seperti kerjasama antara Politeknik Mersing, Johor dengan *Cybersecurity Malaysia* dalam membangunkan Diploma Dwi-Akreditasi Dalam Teknologi Maklumat dan Pensijilan Profesional Keselamatan Siber Global. Selain itu, kerjasama

Politeknik bersama *Malaysia Digital Economy Corporation (MDEC)* juga telah memanfaatkan lebih daripada 10,000 pelajar politeknik dalam program Diploma Teknologi Maklumat (Teknologi Digital) bagi memenuhi keperluan industri digital.

Seiring dengan perkembangan Industri 4.0, KPM juga telah menerbitkan Rangka Kerja TVET 4.0 (2018-2025) sebagai garis panduan kepada institusi TVET di bawah KPM termasuk politeknik, kolej komuniti, kolej vokasional serta *Malaysian Technical University Network (MTUN)*.

Pihak MQA bersama-sama Jabatan Pembangunan Kemahiran (JPK) di bawah Kementerian Sumber Manusia telah mengambil inisiatif untuk mengkaji pelaksanaan dasar TVET negara dengan memperkenalkan Pelaksanaan Sistem Jaminan Kualiti Tunggal TVET.

Bermula September 2019, MTUN telah menawarkan program Sarjana Muda Teknologi yang memberi fokus kepada kebolehan dan kemahiran pelajar dalam sesuatu kemahiran vokasional serta turut menekankan aspek keusahawanan. Ini memberi fleksibiliti kepada pelajar untuk memilih bidang pekerjaan atau menjadi usahawan setelah tamat pengajian.

Sekian, terima kasih.

RJM69

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHE ALIAS BIN HAMID [KEMAMAN]

TARIKH : 6 NOVEMBER 2019 (RABU)

SOALAN NO. 14

Minta **MENTERI TENAGA, SAINS, TEKNOLOGI, ALAM SEKITAR DAN PERUBAHAN IKLIM** menyatakan menyatakan usaha untuk meminda Akta Kualiti Alam Sekeliling 1974 agar lebih relevan dengan isu pencemaran yang berlaku seperti di Sungai Kim Kim, Pasir Gudang.

JAWAPAN

Tuan Yang di-Pertua,

Untuk makluman Ahli Yang Berhormat, Jabatan Alam Sekitar dan Kementerian Tenaga, Sains ,Teknologi , Alam Sekitar dan Perubahan Iklim sedang menggubah baharu Akta Alam Sekitar bagi menggantikan Akta Kualiti Alam Sekeliling (AKAS) 1974. Bagi memastikan Akta baharu Alam Sekitar lebih relevan dan berkesan, pihak Kementerian telah melantik Akademi Sains Malaysia untuk mengkaji kelemahan AKAS dan mencadangkan pengukuhan.

Secara amnya, skop Akta baharu Alam Sekitar akan diperluaskan supaya merangkumi aktiviti-aktiviti baharu manakala penalti kesalahan dijangka lebih tegas. Kajian oleh ASM dijangka siap menjelang penghujung tahun 2019 dan Rang Undang-Undang akan dimuktamadkan di peringkat Kementerian. Pada waktu ini, Rang Undang-Undang Akta baharu Alam Sekitar dijangka dibentangkan pada sesi kedua Parlimen tahun depan. Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

DARIPADA : YB TUAN WONG LING BIU (SARIKEI)

TARIKH : 6 NOVEMBER 2019

SOALAN

TUAN WONG LING BIU [SARIKEI] minta **MENTERI DALAM NEGERI** menyatakan apakah tindakan yang telah diambil untuk menggalakkan lebih ramai orang Cina dan India untuk menyertai perkhidmatan polis. Berapakah peratusan bukan Bumiputera dalam perkhidmatan polis pada masa sekarang.

JAWAPAN

Tuan Yang Di Pertua,

Suruhanjaya Pasukan Polis dan Polis Diraja Malaysia sentiasa berusaha menggalakkan penyertaan pelbagai kaum dalam perkhidmatan PDRM. Berikut adalah langkah-langkah yang telah dijalankan bagi meningkatkan penyertaan kaum lain menyertai PDRM:

- 1) Menghebahkan pengambilan permohonan bagi semua jawatan di dalam PDRM melalui portal SPA (www.spa.gov.my) dan kerjasama dengan pihak Suruhanjaya Perkhidmatan Awam (SPA) telah bermula sejak 20 Mac 2012;

SOALAN NO : 15

- 2) Kaedah baharu dalam pengambilan bagi semua jawatan di dalam PDRM melalui sistem e-Pengambilan Polis Diraja Malaysia telah di hebah melalui media massa dan media cetak pada masa sekarang dan akan dilancarkan pada 29 Oktober 2019 oleh Ketua Polis Negara.
- 3) Hebahan melalui medium media baru seperti ‘*Facebook*’ dan portal rasmi PDRM serta hebahan melalui saluran berita tv tempatan, radio melalui saluran berbahasa Melayu, Cina dan Tamil;
- 4) Kerjasama dengan parti-parti politik dan pertubuhan-pertubuhan bukan kerajaan (NGO) untuk membantu menghebahkan dan mengalakkan belia-belia mereka memohon jawatan mengikut kelulusan akademik melalui laman web SPA;
- 5) PDRM juga dari semasa ke semasa mengadakan pengambilan khas (*special intake*) berdasarkan keperluan semasa sebagai contoh pengambilan khas bagi kaum cina yang telah dilaksanakan pada tahun 2014;
- 6) Mengadakan “*Road Show*” dan pameran di semua peringkat Universiti Kerajaan dan Swasta serta sekolah-sekolah bagi menyampaikan dan menerangkan kerjaya sebagai pegawai polis kepada masyarakat termasuk masyarakat bukan melayu melalui program “*Community Policing*” dan kerjasama masyarakat setempat;
- 7) PDRM juga dari semasa ke semasa menjalankan kajian dan mengemukakan cadangan yang munasabah bagi mendapatkan kenaikan gaji dan elaun-elaun ke satu tahap yang berpatutan mengikut keadaan semasa untuk semua peringkat pangkat anggota polis bagi menarik minat mereka; dan
- 8) Menarik minat mahasiswa / mahasiswi semua bangsa di IPTA Awam untuk memasuki Kor Sukarelawan Polis SUKSIS.

Peratusan bukan Bumiputera dalam perkhidmatan polis pada masa sekarang adalah sebanyak 21.65%.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI ISMAIL SABRI BIN YAAKOB
[BERA]**

TARIKH : 6 NOVEMBER 2019 (RABU)

SOALAN NO. 16

Minta **MENTERI PENDIDIKAN** menyatakan melihat kepada situasi perpaduan amat rapuh akibat daripada sistem persekolahan di Malaysia, apakah Kementerian Pendidikan ingin mengkaji semula cadangan mewujudkan sekolah wawasan bagi merapatkan hubungan antara pelajar berlainan kaum sejak di awal persekolahan.

JAWAPAN

Tuan Yang di-Pertua,

Untuk makluman Ahli Yang Berhormat, konsep sekolah wawasan Kementerian Pendidikan Malaysia (KPM) pada asalnya adalah dua (2) atau tiga (3) buah sekolah berlainan aliran iaitu sekolah kebangsaan (SK), sekolah jenis kebangsaan Cina (SJKC), dan sekolah jenis kebangsaan Tamil (SJKT) beroperasi di dalam satu kawasan yang sama tetapi di bangunan masing-masing dan pentadbiran secara tersendiri. Tujuan sekolah wawasan ditubuhkan adalah untuk mewujudkan semangat perpaduan, integrasi, dan interaksi antara murid pelbagai kaum dan latar belakang melalui perkongsian kemudahan atau prasarana sekolah.

Walau bagaimanapun terdapat beberapa isu yang timbul terhadap pelaksanaan sekolah wawasan seperti kebimbangan berlakunya kehilangan identiti sekolah vernakular iaitu SJKC dan SJKT serta penghapusan fungsi Lembaga Pengelola Sekolah. Perkara-perkara ini sebenarnya tidak berlaku kerana sehingga kini SJKC dan SJKT di sekolah wawasan sedia ada masih kekal dengan identiti masing-masing dan juga kerajaan juga tidak pernah berhasrat untuk menghapuskan mana-mana identiti sekolah jenis kebangsaan. Selain itu, fungsi LPS masih lagi dikekalkan selaras dengan peruntukan dalam Seksyen 62 Akta Pendidikan 1996 [Akta 550].

Bagi memastikan nilai perpaduan dapat dikesalkan dalam kalangan guru dan murid, KPM telah melaksanakan pelbagai langkah seperti berikut:

- i. mengedarkan **Garis Panduan Pelaksanaan Amalan Harian Bagi Perpaduan Di Sekolah Kementerian Pendidikan Malaysia** ke semua sekolah di seluruh Negara bertujuan untuk memberi panduan kepada Pengetua dan Guru Besar (PGB) dalam pelaksanaan amalan harian bagi perpaduan di sekolah KPM.
- ii. pelaksanaan program Rancangan Integrasi Murid Untuk Perpaduan atau RIMUP bagi memberi peluang kepada murid pelbagai kaum daripada berlainan jenis atau aliran sekolah untuk berinteraksi melalui aktiviti kokurikulum yang meliputi lima (5)

elemen iaitu Kesenian dan Kebudayaan, Sukan dan Permainan, Jati Diri dan Patriotisme, Akademik dan Khidmat Masyarakat di sekolah;

- iii. bekerjasama dengan Jabatan Perpaduan Negara dan Integrasi Nasional (PERPADUAN) dengan menubuhkan Kelab Rukun Negara di sekolah seluruh negara untuk melaksana pelbagai aktiviti berteraskan kepada pengukuhan pengetahuan, pemahaman, penghayatan dan pengamalan Rukun Negara dalam kalangan murid melalui program My Rukun Negara, aktiviti Modul Silang Budaya, kem Kelab Rukun Negara, lawatan sambil belajar dan aktiviti khidmat masyarakat sama ada di peringkat daerah, negeri serta kebangsaan.

KPM sehingga kini tiada perancangan untuk menambah sekolah wawasan sedia ada sebaliknya akan memastikan usaha untuk memupuk semangat integrasi antara kaum serta pengukuhan perpaduan dalam kalangan murid dan guru dilaksanakan dengan bersungguh-sungguh termasuk memperkasakan sekolah wawasan sedia ada agar matlamat kerajaan untuk menjadikan Malaysia sebagai sebuah Negara yang bersatu padu dan harmoni akan tercapai.

Sekian, terima kasih.

RJM68

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : PUAN HAJAH NATRAH BINTI ISMAIL [SEKIJANG]

TARIKH : 6 NOVEMBER 2019 (RABU)

SOALAN

PUAN HAJAH NATRAH BINTI ISMAIL [SEKIJANG] minta **MENTERI PERTANIAN DAN INDUSTRI ASAS TANI** menyatakan adakah pihak Kementerian berhasrat untuk mewujudkan institusi pertanian di daerah Segamat dalam usaha untuk memajukan sektor pertanian di daerah ini.

JAWAPAN

Tuan Yang Dipertua,

1. Perkembangan sektor pertanian memerlukan pekerja mahir dan graduan dalam bidang pertanian bagi mengukuhkan industri pertanian negara. Penubuhan institusi pertanian merupakan satu cadangan yang baik untuk melahirkan pekerja mahir dan graduan bidang pertanian. Perkara ini turut dinyatakan di dalam Blueprint Hab Pertanian, BPEN (Bahagian Pembangunan Ekonomi Negeri), di mana sebuah institusi latihan perladangan telah dicadangkan untuk diwujudkan di daerah Segamat. Namun begitu, cadangan tersebut masih di peringkat pertimbangan ekoran kewujudan beberapa institusi pendidikan sedia ada seperti Universiti Teknologi MARA (UiTM), Kolej Komuniti 1 dan 2 serta Kolej Tunku Abdul Rahman di Segamat.
2. Buat masa ini, Jabatan Pertanian Negeri Johor mempunyai pusat latihan petani yang dikenali sebagai Pusat Pertanian Jementah. Pusat ini terletak 20 km daripada bandar Segamat dan menawarkan kursus dan latihan dalam bidang industri asas tani kepada petani, usahawan pertanian dan orang awam yang berminat menceburi bidang tersebut.
3. Jabatan Pertanian juga mempunyai sebuah Institut Pertanian yang terletak di Ayer Hitam, Batu Pahat iaitu lebih kurang 90 km dari Bandar Segamat. Institut Pertanian Ayer Hitam (IPAH) ini menawarkan Program Sijil Pertanian dan Program Sijil Kemahiran Malaysia kepada lepasan SPM atau setaraf yang dapat menampung seramai 200 orang pelatih bagi setiap sesi pengambilan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN HAJI WAN HASSAN BIN MOHD RAMLI
[DUNGUN]**

TARIKH : 6 NOVEMBER 2019 (RABU)

SOALAN NO. 18

Minta **MENTERI PENDIDIKAN** menyatakan:

- (a) statistik ketidakhadiran pelajar ke sekolah terutama di kawasan FELDA, luar bandar dan bandar; dan
- (b) punca dan langkah penyelesaian masalah ini untuk jangka masa panjang.

JAWAPAN

Tuan Yang di-Pertua,

- a) Berdasarkan rekod Kementerian Pendidikan Malaysia (KPM) untuk tempoh Januari hingga November tahun 2018, purata kehadiran murid sekolah FELDA ialah 93.3 peratus bagi 270 buah sekolah rendah dan 89.9 peratus bagi 101 buah sekolah menengah. Manakala purata kehadiran murid bagi seluruh Malaysia sama ada bandar atau luar bandar ialah 93.5 peratus untuk sekolah rendah dan 91.2 peratus untuk sekolah menengah.
- (b) Terdapat beberapa faktor yang dikenal pasti menjadi punca salah laku ponteng sekolah iaitu:
 - i. Murid mempunyai konsep kendiri yang rendah serta kurang motivasi diri untuk mengikuti sesi pembelajaran di sekolah, kurang minat terhadap akademik dan bersikap mementingkan hiburan daripada pelajaran.
 - ii. Suasana keluarga yang tidak tenteram disebabkan pergaduhan, konflik, perpisahan atau kematian ibu bapa, kemiskinan dan desakan untuk bekerja bagi membantu keluarga.
 - iii. Pengaruh rakan sebaya yang mengajak kepada perkara negatif.
 - iv. Suasana sekolah yang kurang menarik pada pandangan murid.

Untuk makluman Ahli Yang Berhormat, KPM sentiasa memandang serius isu ponteng sekolah dalam kalangan murid. Antara langkah penyelesaian yang telah diambil adalah dengan mengeluarkan surat pekeliling ikhtisas dan surat siaran bagi tujuan penegasan kepada pihak sekolah agar sentiasa mengambil tindakan proaktif dalam menangani isu ponteng sekolah dalam kalangan murid.

Kerjasama pihak Persatuan Ibu bapa dan Guru (PIBG) dan Pelibatan Ibu Bapa dan Komuniti (PIBK) turut berfokus untuk membantu mengesan murid yang didapati ponteng sekolah dan berada di luar kawasan sekolah untuk memujuk murid supaya hadir ke sekolah. Pihak sekolah turut mengadakan aktiviti ziarah cakna ke atas keluarga murid yang didapati kerap melakukan salah laku

ponteng sekolah bagi mengenal pasti punca utama masalah tersebut. Ziarah Cakna dilaksanakan oleh guru di sekolah KPM dengan bantuan daripada pihak PIBG bagi memperluas konsep sekolah penyayang dan memperkuuh hubungan antara sekolah dengan ibu bapa, penjaga dan murid. Murid yang dikesan melakukan salah laku ponteng sekolah pula akan dirujuk kepada guru bimbingan dan kaunseling di sekolah untuk tujuan intervensi khusus bagi mengesan punca sebenar salah laku tersebut.

Jabatan Pendidikan Negeri dan Pejabat Pendidikan Daerah juga melaksanakan Program Ops Ponteng dengan kerjasama pihak berkuasa tempatan serta PDRM. Tujuan program tersebut adalah untuk mengesan dan memujuk murid yang dikesan ponteng sekolah dalam daerah masing-masing. Murid akan diserahkan kepada pihak sekolah untuk diadakan sesi kaunseling secara berfokus oleh guru bimbingan dan kaunseling.

Selain itu, KPM menjalankan kerjasama dengan Jabatan Kebajikan Masyarakat (JKM) melalui Jawatankuasa Pasukan Kebajikan Kanak-Kanak JKM. Jawatankuasa ini berperanan membantu kebajikan murid-murid yang ada isu berkaitan kemiskinan.

Selain itu, KPM juga sentiasa memastikan Jawatankuasa Penyiasatan Murid Cicir (JPMC) di peringkat sekolah, PPD dan JPN berjalan seperti yang diarahkan. JPMC berperanan untuk mengesan murid yang didapati cicir dan mengambil tindakan sewajarnya untuk kes tersebut.

Sekian, terima kasih.

RJM63

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : PUAN NOR AZRINA BINTI SURIP [MERBOK]

TARIKH : 6.11.2019 (RABU)

SOALAN

PUAN NOR AZRINA BINTI SURIP [MERBOK] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan dasar dan program pihak Kementerian dalam memastikan wanita terutamanya ibu tunggal tidak dibebani dengan kos sara hidup yang tinggi.

JAWAPAN

Yang di-Pertua,

Kerajaan secara inklusif telah berusaha membantu semua kelompok masyarakat yang terbeban dengan kos sara hidup termasuklah golongan wanita dan ibu tunggal. Antara langkah diambil Kerajaan adalah seperti berikut:

- (i) Kerajaan mengambil inisiatif dalam menambahbaik pendapatan boleh guna rakyat melalui beberapa inisiatif mengurangkan kos sara hidup rakyat melalui pelbagai bantuan-bantuan tunai dan subsidi Kerajaan seperti Bantuan Sara Hidup serta subsidi pengangkutan seperti Pas My100 dan My50.
- (ii) KPDNHEP turut bekerjasama dengan Kementerian berkaitan seperti Kementerian Pertanian dan Industri Asas Tani (MOA) dalam memastikan harga barang makanan yang stabil melalui bekalan yang mencukupi.
- (iii) Terdapat juga pelbagai inisiatif lain di pelbagai Kementerian dan agensi kerajaan yang fokus untuk membantu golongan wanita termasuklah ibu tunggal tanpa mengenepikan golongan lain yang dirasakan patut turut dibantu seperti belia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

DARIPADA : DATO' SRI HAJI TAJUDDIN BIN ABDUL RAHMAN [PASIR SALAK]

TARIKH : 6 NOVEMBER 2019 (RABU)

SOALAN

Minta **MENTERI PERTANIAN DAN INDUSTRI ASAS TANI** menyatakan tindakan serta hasil yang telah dicapai oleh Kementerian untuk menampung kekurangan peruntukan yang diluluskan pada Belanjawan tahun lalu bagi petani, penternak dan nelayan.

JAWAPAN

Yang di-Pertua,

1. Pada tahun 2019, Kementerian Pertanian dan Industri Asas Tani telah diperuntukkan RM4.4 billion berbanding RM5.5 billion pada tahun 2018. Pengurangan ini telah menjelaskan peruntukan keseluruhan bagi program seperti Subsidi Baja Padi, Insentif Pengeluaran Padi dan Elaun Sara Hidup Nelayan Laut dan Darat (ESHN).
2. Bagi mengatasi pengurangan tersebut, Kementerian telah menyusun semula program yang telah dirancang melalui pendekatan *do more with less* dengan mengamalkan perbelanjaan berhemah dan subsidi bersasar. Kementerian juga telah melaksanakan program pemutihan bagi memastikan hanya golongan nelayan dan pesawah yang layak sahaja menerima bantuan.

NO SOALAN : 20

3. Walau bagaimanapun, pada Ogos 2019, Kementerian telah diluluskan peruntukan tambahan sebanyak RM396 juta bagi menampung peruntukan sedia ada bagi meneruskan kesinambungan Skim Subsidi Industri Padi dan ESHN. Di samping itu, Kementerian masih meneruskan program-program sedia ada yang berupaya meningkatkan pendapatan tambahan golongan sasar minimum RM500 sebulan seperti berikut:

- i. Program Rezeki Tani;
- ii. Program Pinjaman Dana Nelayan dan Bantuan Sistem Penyampaian dan Khidmat Sokongan (SPeKS);
- iii. Bantuan Peningkatan Hasil Sayur;
- iv. Kluster Tanaman Kontan;
- v. Tanam Semula Buah-buahan;
- vi. Geran dan pakej pembiayaan Agropreneur Muda melalui Agrobank dan TEKUN Nasional;
- vii. Pembiayaan bagi ternakan (PROPER); dan
- viii. Program Pembangunan Industri Tenusu Negara.

4. Kementerian akan memastikan dengan penyusunan semula program yang telah dirancang ini masih mencapai objektif asal dalam membantu meningkatkan produktiviti pertanian dan kebajikan golongan sasar.

Sekian, terima kasih.

NO. SOALAN : 21

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI HASANUDDIN BIN MOHD
YUNUS [HULU LANGAT]**

TARIKH : 6 NOVEMBER 2019 (RABU)

SOALAN

Minta **Menteri Pendidikan** menyatakan adakah Kementerian akan memantau penempatan mesin layan diri (*vending machine*) di sekolah yang menjual minuman bergas dalam tin yang mengandungi kadar gula yang tinggi serta tidak menyihatkan murid di sekolah

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa memberikan perhatian berat terhadap kesihatan dan keselamatan murid. Sehubungan dengan itu, KPM telah menetapkan bahawa makanan dan minuman dalam kategori tidak digalakkan untuk dijual dimasukkan ke dalam kategori dilarang untuk dijual di kantin sekolah selaras dengan Garis Panduan Pemakanan Sihat di Sekolah yang dikeluarkan oleh Kementerian Kesihatan Malaysia (KKM) pada tahun 2016. Surat siaran KPM pada 26 April 2017 telah menegaskan bahawa semua perkhidmatan mesin layan diri yang menjual makanan dan minuman yang dilarang tidak dibenarkan berada di premis dan kawasan sekolah. Produk makanan dan minuman bagi mesin layan diri mestilah mematuhi senarai makanan dan minuman yang boleh dijual yang dikeluarkan oleh KKM.

Untuk makluman Ahli Yang Berhormat, semua kontrak perkhidmatan mesin layan diri yang berada di premis dan kawasan sekolah mestilah mendapat kebenaran dan kelulusan daripada Pengarah Pendidikan Negeri kecuali yang diuruskan oleh pengusaha kantin yang dilantik dan berada di premis kantin sekolah. Sehubungan dengan itu, Jabatan Pendidikan Negeri (JPN), Pejabat Pendidikan Daerah (PPD) dan pentadbir sekolah bertanggungjawab memantau perkhidmatan mesin layan diri sekolah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATUK ZAHIDI BIN ZAINUL ABIDIN
[PADANG BESAR]**

TARIKH : 6 NOVEMBER 2019 (RABU)

SOALAN NO. 22

Minta **Menteri Pendidikan** menyatakan apakah kajian terperinci yang telah dijalankan bagi penggabungan Universiti Sultan Zainal Abidin (UNISZA) dan Universiti Malaysia Terengganu (UMT) dan adakah penggabungan ini akan menyebabkan pengurangan penjawatan dan pengurangan kos pengurusan.

JAWAPAN

Tuan Yang di-Pertua,

Untuk Makluman Ahli Yang Berhormat, Penggabungan Universiti Sultan Zainal Abidin (UNISZA) Dan Universiti Malaysia Terengganu (UMT) merupakan peluang untuk memperkasakan lagi kebitaraan bidang fokus kedua-dua buah universiti terutama dalam bidang sains kelautan dan peradaban islam. Berdasarkan kepada kebolehupayaan dan sumber kepakaran kedua-dua universiti, Jemaah Menteri pada 4 September 2019 telah bersetuju supaya kedua-dua universiti ini digabungkan.

Kementerian Pendidikan Malaysia (KPM) telah melaksanakan beberapa siri libat urus dengan agensi pusat seperti Jabatan Perkhidmatan Awam (JPA), Kementerian Kewangan (MOF), Kementerian Hal Ehwal Ekonomi (MEA) dan Jabatan Peguam Negara (AGC) serta warga UNISZA dan UMT. Sesi libat urus yang berterusan akan dilaksanakan bagi memastikan dapatan aspirasi yang inklusif bagi memenuhi kehendak dan keperluan kecemerlangan pendidikan, penyelidikan dan sumbangan kepada masyarakat dan pembangunan negara.

KPM melihat penggabungan ini akan memperkasakan kecemerlangan bakat melalui penyatuan tenaga pakar akademik, meningkatkan kualiti penyampaian pendidikan tinggi dan menggalakkan penyelidikan antara bidang (*transresearch*) dalam kalangan tenaga pakar akademik dan mahasiswa. Pihak JPA bersetuju dengan cadangan untuk mengekalkan perjawatan sedia ada sehingga penyusunan semula sumber manusia dilaksanakan dan diselaraskan mengikut dasar kawalan saiz perkhidmatan awam.

Antara rasionalisasi penggabungan UMT-UNISZA adalah seperti berikut:

- i. melonjakkan pencapaian dan kecemerlangan akademik, penyelidikan dan pengantarabangsaan dengan gabungan kekuatan kepakaran kedua-dua universiti agar setanding dengan universiti terkemuka di dunia;

- ii. melipatgandakan kapasiti, keberhasilan dan impak sumber manusia, kepakaran, dan fasiliti universiti berprestasi tinggi dan berdaya saing kepada pemegang taruh pendidikan tinggi.
- iii. menjadi sebuah pusat rujukan kbeitaraan di peringkat global dalam era merentas disiplin (*transdisciplinary*).

Negara-negara maju seperti United Kingdom dan Norway, telah menggunakan pakai model penggabungan yang berbeza, namun tujuan penggabungan adalah sama iaitu bagi memenuhi keperluan mahasiswa dan meningkatkan daya saing antara universiti.

Justeru, penggabungan ini bakal memperkasa hub pendidikan tinggi di negeri Terengganu serta mempertingkat kebitaraan bidang fokus kedua-dua buah universiti. Sehubungan dengan itu, Penggabungan UMT-UNISZA ini harus dilihat dari sudut positif iaitu sebagai satu daripada siri anjakan transformasi penyampaian pendidikan tinggi terutamanya dalam memantapkan keupayaan universiti selaras dengan Lonjakan 8 (Keunggulan Global) dan Lonjakan 10 (Transfomasi Penyampaian Pendidikan Tinggi) dalam Pelan Pembangunan Pendidikan Malaysia (Pendidikan Tinggi) 2015 – 2025, selain melihat kepada kepentingan negara dalam memperkuuh institusi pendidikan tinggi secara keseluruhan terutamanya di negeri Terengganu. Kerajaan juga akan memastikan penggabungan ini memberi manfaat kepada mana-mana pihak yang terlibat.

Dalam masa yang sama, perkara ini masih di dalam peringkat Jawatankuasa Pemandu. Sesi libat urus bersama pihak berkepentingan akan diteruskan bagi melibatkan lebih ramai pemegang taruh dalam proses perbincangan.

Walau apa pun, Kerajaan akan memastikan penggabungan ini tidak akan merugikan mana-mana pihak yang terlibat kerana ia dapat melonjakkan prestasi dan pencapaian universiti ke tahap yang lebih cemerlang di peringkat negara dan antarabangsa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHANG LIH KANG [TANJONG MALIM]

TARIKH : 6 NOVEMBER 2019 (RABU)

SOALAN NO. 23

Minta **MENTERI PENDIDIKAN** menyatakan bilangan pemohon dan bilangan yang ditawarkan dalam bidang pengkhususan Bahasa Cina, Program Ijazah Sarjana Muda Perguruan (PISMP) tahun 2018 dan 2019.

JAWAPAN

Tuan Yang di-Pertua,

Untuk makluman Ahli Yang Berhormat, pada tahun 2018, sebanyak 153 permohonan telah diterima bagi mengikuti program Bahasa Cina bagi Program Ijazah Sarjana Muda Perguruan (PISMP). Daripada 153 permohonan, 20 pemohon telah berjaya ditawarkan tempat bagi aliran sekolah jenis kebangsaan cina (SJKC) dan 53 pemohon bagi aliran sekolah kebangsaan (SK).

Manakala bagi tahun 2019 pula, sebanyak 179 permohonan telah diterima bagi mengisi 20 tempat bagi aliran SJKC mengikut unjuran yang telah ditetapkan. Daripada 179 permohonan, 25 calon telah berjaya ditawarkan tempat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PARLIMEN KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD MARZUK BIN SHAARY
[PENGKALAN CHEPA]**

TARIKH : 6.11.2019 (RABU)

SOALAN NO. 2

minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan penjelasan mengapa produk-produk keluaran syarikat *non-Muslim* yang dibenarkan menggunakan nama dan lambang seperti masjid, Kaabah, bulan sabit, bintang, simbol atau tulisan yang boleh dikaitkan dengan Islam sedangkan ianya boleh mengelirukan pembeli daripada kalangan umat Islam.

JAWAPAN

Tuan Yang di-Pertua,

1. Di bawah bidang kuasa Kementerian ini, tiada undang-undang khusus yang melarang penggunaan nama dan lambang seperti masjid, Kaabah, bulan sabit, bintang, simbol atau tulisan yang boleh dikaitkan dengan Islam. Walau bagaimanapun, sekiranya produk-produk keluaran *non-muslim* yang tidak memperolehi pensijilan halal dan menggunakan nama atau lambang yang merujuk kepada agama Islam, Kementerian boleh menyiasat dan mengambil tindakan kes berdasarkan Perintah Perihal Dagangan (Takrif Halal) 2011 dan Perintah Perihal Dagangan (Perakuan dan Penandaan Halal) 2011.

2. Asas kepada tindakan pemeriksaan yang dilaksanakan oleh Kementerian ini adalah bagi memastikan produk makanan atau premis

makanan yang menggunakan perbahasaan halal adalah disahkan halal oleh badan berkuasa berwibawa iaitu JAKIM dan Majlis Agama Islam Negeri, bukanlah bagi memastikan ianya dimiliki oleh orang Islam semata-mata.

3. Tidak semua nama dan perlambangan seperti kubah, bulan, bintang dan tulisan jawi pada produk makanan boleh terus dikaitkan dengan agama Islam atau halal dan seterusnya mengambil tindakan kes ke atas syarikat *non-muslim*. Hal ini kerana, penggunaan nama dan perlambangan tersebut masih terbuka kepada tafsiran yang lain selain daripada agama Islam atau halal. Sebagai contoh ejaan nama syarikat dalam tulisan jawi yang tidak mengaitkan bahawa produk yang dijual adalah halal.
4. Namun begitu, seandainya penggunaan nama dan perlambangan pada sesuatu produk makanan itu memberi indikasi yang boleh diertikan sebagai halal, antaranya terdapat bukti-bukti sokongan lain seperti penggunaan ungkapan '*Muslim friendly*', '*shariah compliance*', petikan terjemahan ayat Al-Quran dan sebagainya. Maka, siasatan boleh dijalankan di bawah kedua-dua Perintah Perihal Dagangan tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHA KEE CHIN [RASAH]

TARIKH : 6 NOVEMBER 2019 (RABU)

SOALAN

Minta **MENTERI PENDIDIKAN** menyatakan apakah status terkini pembinaan SJKT di kawasan Taman Rasah Jaya/Taman Thivy Jaya, yang pernah dijanjikan oleh KPM beberapa tahun yang lalu, sama ada ia merupakan sekolah yang baru atau dipindahkan dari lokasi yang kurang murid.

JAWAPAN

Tuan Yang di-Pertua,

Untuk makluman Ahli Yang Berhormat, pada 14 April 2014, Kementerian Pendidikan Malaysia (KPM) telah memberi kelulusan kepada Sekolah Jenis Kebangsaan Tamil (SJKT) Ladang Perhentian Tinggi, Sg. Gadut, Negeri Sembilan untuk berpindah ke tapak baharu hak milik Koperasi Pekerja Jaya Berhad di Mukim Rasah, Daerah Seremban Negeri Sembilan seluas 1.56 ekar.

SJKT Ladang Perhentian Tinggi merupakan sekolah bantuan kerajaan yang mempunyai enrolmen murid seramai 40 orang dengan bilangan guru 10 orang. Sekolah ini berstatus sekolah bantuan kerajaan yang berada dalam kategori sekolah kurang murid. Perpindahan ini diberikan berdasarkan justifikasi bahawa sekolah sedia ada menghadapi enrolmen yang semakin menurun akibat migrasi masyarakat India daripada kawasan ladang tersebut serta tapak baharu yang dicadangkan berpotensi untuk menyumbang kepada peningkatan enrolmen.

Walau bagaimanapun, sehingga kini permohonan untuk pembinaan sekolah ini masih belum dikemukakan kepada KPM oleh pihak Lembaga Pengelola Sekolah yang bertanggungjawab untuk membiaya kos pembinaan sekolah ini di tapak baharu. Berdasarkan peruntukan di dalam Akta Pendidikan 1996 di bawah Seksyen 83, sebarang cadangan untuk pembinaan bangunan baharu perlu dikemukakan untuk kelulusan KPM sebelum pembinaan boleh dijalankan bagi memastikan pembinaan tersebut mematuhi prosedur yang ditetapkan serta tiada implikasi bebanan kos pada masa akan datang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI DR. AHMAD ZAHID BIN HAMIDI
[BAGAN DATUK]**

TARIKH : 6.11.2019 (RABU)

SOALAN NO. 26

Dato' Seri Dr. Ahmad Zahid bin Hamidi [Bagan Datuk] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan sejauh manakah program ‘*Food Bank Malaysia*’ yang dilaksanakan sejak Ogos 2018 telah membantu dalam mengurangkan pembaziran makanan di dalam negara ini dan berapakah anggaran rakyat Malaysia yang telah menerima manfaat daripada program ini.

JAWAPAN

Yang di-Pertua,

Kementerian Perdagangan Dalam Negeri dan Hal Ehwal Pengguna (KPDNHEP) terus komited dalam mencari kaedah terbaik bagi meringankan beban kos sara hidup rakyat. Salah satu inisiatif yang telah dilaksanakan adalah Program Food Bank Malaysia (PFBM). PFBM telah secara rasminya dilancarkan pada 22 Disember 2018 Antara lain, objektif program ini adalah untuk membantu golongan kurang berkemampuan mendapatkan akses bekalan makanan agar dapat meringankan kos sara hidup golongan tersebut, memberikan kesedaran kepada pengguna berkenaan inisiatif zero waste bagi mengelakkan pembaziran makanan, mengurangkan pembaziran makanan yang masih boleh diguna semula dan mewujudkan struktur pengurusan lebihan makanan yang lebih tersusun dan terancang.

Berdasarkan statistik yang dikeluarkan oleh Perbadanan Sisa Pepejal Negara (SWCorp), rakyat Malaysia menjana 15,000 tan lebihan makanan setiap hari dan 3,000 tan daripada lebihan makanan tersebut masih selamat untuk dimakan. Sekiranya 3,000 tan makanan tersebut dioptimakan penggunaan maka kuantiti ini boleh dimanfaatkan oleh 2 juta orang rakyat Malaysia yang memerlukan.

Sehingga Ogos 2019, seramai 311,189 ahli isi rumah telah berjaya mendapat manfaat daripada program ini. Secara tidak langsung, ianya telah berjaya menyelamatkan sebanyak 1,701 metrik tan lebihan makanan dan dianggarkan sebanyak RM 8.51 juta nilai lebihan makanan yang berjaya diselamatkan. Selain itu, semenjak 15 Februari 2009 KPDNHEP juga telah melancarkan Program Food Bank Siswa bagi membantu menangani kos sara hidup mahasiswa di Universiti. Sehingga September 2019, sebanyak 4,970 mahasiswa telah mendapat manfaat daripada program ini.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : YB TUAN SANISVARA NETHAJI RAYER A/L
RAJAJI (JELUTONG)**

TARIKH : 6 NOVEMBER 2019

SOALAN

Tuan Sanisvara Nethaji Rayer A/L Rajaji [Jelutong] minta **MENTERI DALAM NEGERI** menyatakan kenapa Kerajaan enggan mengekstradisi Dr. Zakir Naik kembali ke India tetapi mengekstradisi keluarga Arif Komis ke Turki.

JAWAPAN

Tuan Yang Di Pertua,

Untuk makluman Yang Berhormat, Kementerian ini telah menerima permintaan ekstradisi Dr. Zakir Naik daripada Kerajaan India pada 19 Januari 2018 atas tuduhan pengubahan wang haram dan mempromosikan keganasan.

Kerajaan telah membuat pertimbangan berdasarkan peruntukan di dalam Triti Ekstradisi di antara Kerajaan Malaysia dan Kerajaan India serta Akta Ekstradisi 1992 dengan mengambil kira penelitian terhadap bukti-bukti yang dikemukakan termasuk semua faktor dan fakta kes.

Kerajaan Malaysia memutuskan untuk tidak mengekstradisi Dr. Zakir Naik ke negara India kerana Akta Ekstradisi 1992 (Akta 479) memperuntukkan *Restrictions on return of fugitive criminals* termasuk kesalahan yang pemulangannya bersifat politik, tujuan membicarakan,

SOALAN NO : 27

menghukum berdasarkan kesalahan bersifat politik atau dia mungkin terjejas dalam perbicaraannya atau dihukum oleh sebab rasnya, agamanya, kerakyatannya atau fahaman politiknya bagi maksud mendakwa atau menghukum.

Selain itu, terdapat peruntukan Akta Ekstradisi 1992 untuk tidak meneruskan proses ekstradisi dengan mengambil kira segala hal keadaan demi kepentingan keadilan jika orang yang dikehendaki tersebut tidak akan mendapat keadilan jika dihantar pulang atau terdapat suatu penindasan atau ancaman nyawa terhadapnya.

Semakan terhadap Dr. Zakir Naik juga mendapati beliau tidak tersenarai dalam *red notice Interpol* dan entiti penganas di dalam senarai United Nation Security Council Resolutions (UNSCR) sebagai orang yang dikehendaki mahu pun penganas yang disyaki.

Hal ini berbeza dengan pengusiran Arif Komis di mana siasatan secara terperinci dilakukan oleh pihak Polis Diraja Malaysia mengesahkan beliau merupakan anggota kanan gerakan *Fetullah Gulen Terrorist Organization* (FETO) yang telah disenaraikan oleh Kerajaan Turki sebagai organisasi penganas kerana terlibat dalam aktiviti militan untuk menggulingkan kerajaan sedia ada. Malahan, Pertubuhan Kerjasama Islam (OIC) turut menyenaraikan FETO sebagai penganas.

Sekiranya tidak dibendung, FETO berpotensi memberi ancaman serius kepada keselamatan negara. Pengalaman dan modus operasi seperti insiden cubaan rampasan kuasa yang berlaku di Turki dikhuatiri akan mempengaruhi rakyat di negara ini. Perkara ini adalah selari dengan dasar kerajaan Malaysia untuk tidak membenarkan Malaysia menjadi tempat oleh mana-mana pihak sebagai pangkalan untuk melancarkan serangan terhadap negara - negara lain.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' DR. SHAMSUL ANUAR BIN HAJI
NASARAH [LENGGONG]**

TARIKH : 6 NOVEMBER 2019 (RABU)

SOALAN NO. 28

Minta **MENTERI PENDIDIKAN** menyatakan apakah insentif yang ditawarkan oleh pihak Perbadanan Tabung Pendidikan Tinggi Nasional (PTPTN) kepada peminjam yang membuat pembayaran balik pinjaman pengajian.

JAWAPAN

Tuan Yang di-Pertua,

Untuk makluman Ahli Yang Berhormat, pada masa kini, dasar-dasar sedia ada bayaran balik yang tidak dibatalkan masih diteruskan pelaksanaan. Cadangan mekanisme atau insentif baharu bayaran balik pinjaman Perbadanan Tabung Pendidikan Tinggi Nasional (PTPTN) hasil daripada sesi konsultasi rakyat akan diumumkan setelah mendapat kelulusan Jemaah Menteri.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : DATO' ROSOL BIN WAHID
[HULU TERENGGANU]**

TARIKH : 6 NOVEMBER 2019

SOALAN

DATO' ROSOL BIN WAHID [HULU TERENGGANU] minta **MENTERI DALAM NEGERI** menyatakan apakah tindakan yang telah diambil ke atas individu yang menghina Jalur Gemilang iaitu dengan memasang dan memuat naik gambar jalur putih kepada warna hitam; dan memasangnya secara terbalik dengan sengaja.

JAWAPAN

Tuan Yang Di Pertua,

Jalur Gemilang adalah simbol dan identiti penting Persekutuan Malaysia. Ia mempunyai nilai dan darjah yang melambangkan kedaulatan, kemerdekaan dan kebebasan negara. Oleh itu, sebarang penghinaan ke atas Jalur Gemilang oleh pihak yang tidak bertanggungjawab amatlah tidak wajar dan perbuatan tersebut boleh membangkitkan kemarahan rakyat Malaysia apatah lagi jika dilakukan oleh segelintir warganegara Malaysia sendiri. Oleh itu, Kerajaan tidak teragak-agak untuk mengambil tindakan terhadap pihak-pihak yang sengaja menghina Jalur Gemilang termasuklah dengan memasang secara terbalik dengan sengaja dengan mengambil kira aspek kepentingan negara dan ketenteraman awam secara keseluruhan berlandaskan peruntukan undang-undang yang berkuatkuasa.

Isu penghinaan Jalur Gemilang boleh disiasat di bawah Seksyen 504 Kanun Keseksaan iaitu dengan sengaja mengaibkan dengan niat hendak membangkitkan pecah keamanan, Seksyen 233 Akta Komunikasi & Multimedia 1998 yang memperuntukkan kesalahan penggunaan tidak wajar kemudahan rangkaian atau perkhidmatan rangkaian dan Seksyen 14, Akta Kesalahan Kecil iaitu kelakuan yang menghina.

Untuk makluman Ahli Yang Berhormat, pihak Polis DiRaja Malaysia telah menerima sebanyak 69 laporan berhubung isu penghinaan Jalur Gemilang, dan 9 kertas siasatan telah pun dibuka. Kes-kes tersebut masih di dalam siasatan dan semua kertas siasatan akan dirujuk ke Pejabat Peguam Negara dalam masa terdekat.

**PEMBERITAHUAN PERTANYAAN DEWAN NEGARA
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI AHMAD NAZLAN BIN IDRIS
[JERANTUT]**

TARIKH : 6 NOVEMBER 2019 (RABU)

SOALAN

Minta **MENTERI PERTANIAN DAN INDUSTRI ASAS TANI** menyatakan bilakah Kerajaan akan mengumumkan dapatan kajian Dasar Agromakanan Negara 2.0 bagi tempoh tahun 2021 hingga tahun 2030 serta pelan tindakan bagi mencapai dapatan kajian tersebut.

JAWAPAN

Tuan Yang Dipertua,

1. Kajian Dasar Agromakanan Negara (DAN 2.0) sedang dilaksanakan oleh pihak perunding yang dilantik dengan tempoh selama 18 bulan dan dijangka siap sepenuhnya pada Februari 2021. Hasil dapatan kajian ini akan dimasukkan dalam Pelan DAN 2.0 yang dijangka akan dilancarkan bersama pelan tindakan pada 2021.
2. Secara umumnya, tiga objektif DAN sedia ada iaitu menjamin bekalan makanan yang mencukupi dan selamat dimakan, menjadikan industri agromakanan berdaya saing dan mampan dan meningkatkan pendapatan usahawan tani akan diteruskan dalam pelaksanaan DAN 2.0 kelak.
3. Selain itu, DAN 2.0 juga akan terus menangani isu-isu semasa sektor agromakanan seperti ketidakstabilan harga input pertanian, penurunan kadar pertukaran wang asing yang memberi kesan kepada nilai import dan eksport bahan makanan, kebergantungan tinggi terhadap pekerja, peningkatan defisit Imbalance Dagangan dan sebagainya dalam tempoh sedekad. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

DARIPADA : TUAN OSCAR LING CHAI YEW [SIBU]

TARIKH : 6 NOVEMBER 2019 (RABU)

SOALAN NO. 31

Minta **MENTERI PENDIDIKAN** menyatakan jumlah penerima basiswa Kerajaan setiap tahun dari 2000 hingga 2019 mengikut pecahan program berikut; basiswa nasional, lepasan *bursary*, universiti terkemuka, program khas kejuruteraan Jepun, Perancis, Jerman, Korea dan universiti-universiti negara China .

JAWAPAN

Tuan Yang di-Pertua,

Kementerian Pendidikan Malaysia (KPM) ada menyediakan program tajaan biasiswa kepada pelajar untuk melanjutkan pengajian di peringkat Ijazah Pertama, Sarjana dan Kedoktoran di negara Perancis, China, Jepun dan Korea. Seramai seratus lima (105) orang penerima biasiswa KPM bagi tahun 2017 hingga 2019 yang melanjutkan pengajian di empat (4) negara tersebut bagi Program Penghantaran Pelajar Cemerlang ke China Untuk Pembelajaran Bahasa Mandarin Dalam Kalangan Penutur Jati, Skim Latihan Akademik Bumiputera (SLAB), Skim Latihan Akademik IPTA (SLAI), Sub Kepakaran (SK), Program Berkembar Praperkhidmatan Bahasa Perancis dan Post Doktoral (PD).

Untuk makluman Ahli Yang Berhormat, selain KPM, Jabatan Perkhidmatan Awam (JPA) turut menyediakan penajaan kepada pelajar melanjutkan pengajian ke institusi pendidikan tinggi (IPT).

Bagi menyokong hasrat Kerajaan untuk memartabatkan IPT tempatan serta usaha menjadikan Malaysia sebagai hab pendidikan, penghantaran pelajar ke luar negara di bawah program biasiswa JPA hanya terhad kepada universiti terkemuka serta bidang-bidang keperluan negara sahaja. Jumlah keseluruhan penerima tajaan JPA ke luar negara bagi Program Penajaan Nasional (PPN), Program Khas Jepun, Korea, Perancis dan Jerman (JKPJ) dan Program Lepasan Bursary dari tahun 2013 hingga 2018 adalah seramai 2,791 orang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN NIK MOHAMAD ABDUH BIN NIK
ABDUL AZIZ [BACHOK]**

TARIKH : 6 NOVEMBER 2019 (RABU)

SOALAN

Minta **MENTERI PENDIDIKAN** menyatakan pendirian Jawatankuasa Pasukan Petugas Dasar UEC (PPDUEC) berkenaan status sijil UEC bagi kemasukan ke Universiti Awam (UA).

JAWAPAN

Tuan Yang di-Pertua,

Untuk makluman Ahli Yang Berhormat, sehingga kini, status pengiktirafan Sijil Peperiksaan Bersepadu (UEC) masih kekal seperti sedia ada kerana Pasukan Petugas Dasar *Unified Examination Certificate* (PPDUEC) sedang dalam proses akhir kajian mengenai isu pengiktirafan sijil UEC sebagai syarat am kelayakan untuk memasuki institusi pengajian tinggi awam (IPTA). Pada masa kini, PPDUEC dalam peringkat akhir penulisan laporan mengenai isu UEC. Dapatan dan syor-syor berkaitan akan diteliti oleh pihak Kementerian dan seterusnya akan diangkat kepada Jemaah Menteri untuk keputusan dasar mengenai isu pengiktirafan sijil UEC.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' DR. HAJI NOOR AZMI BIN GHAZALI
[BAGAN SERAI]**

TARIKH : 6 NOVEMBER 2019 (RABU)

SOALAN NO. 33

Minta **MENTERI PERTANIAN DAN INDUSTRI ASAS TANI** menyatakan sejauh manakah pesawah-pesawah akan mendapat manfaat daripada program estet padi dan bagaimanakah PPK dan agensi-agensi yang berkaitan dapat memainkan peranan yang lebih berkesan dalam membantu meningkatkan pendapatan golongan ini.

JAWAPAN

Tuan Yang di-Pertua,

1. Untuk makluman Ahli Yang Berhormat, program estet padi ini boleh melibatkan beberapa model pengurusan ladang secara berpusat mulai peringkat penanaman, penuaian sehingga ke pemasaran. Buat masa ini, Kerajaan berusaha mengetengahkan idea penyatuan pengurusan ladang yang akan diuruskan oleh satu badan pengurusan samada seperti syarikat *Special Purpose Vehicle* (SPV) atau koperasi. Konsep penyatuan pengurusan tanah ini akan hanya melibatkan penyatuan pengurusan tanah tanpa sebarang pengambilalihan atau pertukaran hak milik tanah pesawah. Buat masa ini, beberapa program sedia ada di bawah Projek Pemacu Pertanian (PPP) seperti *Entry Point Project*, EPP#10 dan EPP#11 boleh diambil sebagai asas pelaksanaan konsep estet padi ini. Konsep estet padi ini akan memberi kesan positif kepada pemilik tanah sawah terutamanya yang bersaiz kecil apabila pengurusan tanah ini disatukan di bawah satu badan pengurusan.

2. Antara manfaat pesawah-pesawah daripada program estet padi adalah seperti berikut:

- i. Keseragaman dalam pengurusan estet padi secara efisien;
- ii. Pengurangan kos pengeluaran padi berdasarkan pelaksanaan Projek Estet Padi dilaksanakan secara berpusat selain menjimatkan sumber seperti input;
- iii. Menambah pengeluaran hasil padi melalui pelaksanaan projek secara berskala besar dan seterusnya dapat meningkatkan pendapatan pesawah; dan
- iv. Meningkatkan kecekapan pengurusan ladang di mana aktiviti penanaman padi dilaksanakan secara seragam dan mematuhi syor yang ditetapkan seperti jadual penanaman dan *Rice Check*.

3. Pertubuhan Peladang Kawasan (PPK) dan pelbagai agensi berkaitan seperti Lembaga Pertubuhan Peladang (LPP), Jabatan Pertanian (DOA) dan Institut Penyelidikan dan Kemajuan Pertanian Malaysia (MARDI) boleh menjadi pemangkin pelaksanaan konsep estet padi dan penyatuan pengurusan tanah sawah ini. Agensi berkaitan boleh memainkan peranan dalam aspek penggembangan tenaga kerja, penyelarasan jadual gerak kerja, pengagihan sumber dan input, khidmat bimbingan dan pemasaran. Melalui estet padi, tanah sawah milik petani didaftarkan melalui PPK untuk menjadi satu kawasan pengeluaran padi yang luas dan tersusun. Dengan pelaksanaan aktiviti persawahan secara sistematis dan mendisiplinkan peladang kepada amalan pengurusan ladang yang baik (*myGAP*), hasil padi dapat ditingkatkan secara optima yang akhirnya akan menjana peningkatan pendapatan kepada pemilik tanah dan pesawah.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATUK DR. JEFFREY GAPARI KITINGAN
(KENINGAU)**

TARIKH : 6 NOVEMBER 2019 (RABU)

SOALAN

Minta **MENTERI PERTAHANAN** menyatakan bilakah Kerajaan akan mengaktifkan semula Ranjer dan Pengawal Sempadan (Border Scouts) Sabah dan Sarawak untuk membantu mengawal keselamatan dan sempadan Sabah dan Sarawak memandangkan pihak Sarawak pun bersetuju kepada cadangan tersebut.

JAWAPAN

Tuan Yang di-Pertua,

Kementerian Pertahanan memandang serius isu keselamatan negara terutamanya di Sabah dan Sarawak. Ketika ini, Angkatan Tentera Malaysia (ATM) telah pun menempatkan formasi-formasi di kedudukan strategik bagi mempertahankan kedaulatan negara. Pasukan yang sedia ada kini mampu untuk melaksanakan tugas menjaga keselamatan. Justeru dengan itu, pada masa kini, Kerajaan tidak merancang untuk mengaktifkan semula "Sarawak Rangers" dan "Border Scouts Sabah".

ATM juga telah memperkuatkan pertahanan di negeri Sarawak dan Sabah dengan menstruktur semula organisasi Tentera Darat agar dapat beroperasi secara serentak di kedua-dua wilayah terutamanya Markas Pemerintahan Medan Timur yang melibatkan pengstrukturan satu Divisyen Infantri dan Dua Briged Infantri di wilayah Malaysia Timur. Selain itu, ATM turut mengaturgerakkan trup dan aset yang bersesuaian untuk membantu kawalan keselamatan di *Eastern Sabah Security Zone (ESSZONE)* di bawah kawalan pemerintahan *Eastern Sabah Security Command (ESSCOM)*.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' JOHARI BIN ABDUL
[SUNGAI PETANI]**

TARIKH : 6 NOVEMBER 2019 (RABU)

SOALAN NO. 35

Minta **MENTERI PENDIDIKAN** menyatakan adakah Kementerian bercadang untuk memperkenalkan subjek sejarah khusus tentang Perjanjian Malaysia 1963 (MA 63) dan subjek ini diajar seawal di sekolah rendah agar rasa cinta kepada Malaysia ditanam awal pada pelajar-pelajar.

JAWAPAN

Tuan Yang di-Pertua,

Kurikulum yang terdapat dalam buku teks Sejarah yang digunakan di sekolah-sekolah Kementerian Pendidikan Malaysia (KPM) adalah berdasarkan kepada Dokumen Standard Kurikulum dan Pentaksiran (DSKP) yang disediakan oleh Bahagian Pembangunan Kurikulum (BPK), KPM. Untuk makluman Ahli Yang Berhormat, fakta yang berkaitan dengan Perjanjian Malaysia 1963 (MA63) sememangnya telah dimasukkan dalam kurikulum buku teks Sejarah. Perjanjian Malaysia ini diajarkan di bawah tajuk Pembentukan Malaysia dan merupakan peristiwa bersejarah bagi negara yang perlu dipelajari oleh murid sama ada di peringkat sekolah rendah maupun di peringkat sekolah menengah.

Penjelasan tentang sejarah Pembentukan Malaysia dan Perjanjian Malaysia 1963 ini dinyatakan secara berbeza-beza mengikut aras dan tahap keupayaan murid. Mata pelajaran Sejarah telah pun diajar kepada murid sekolah rendah tahap dua (Tahun 4, 5 dan 6) sebagai salah satu usaha memupuk rasa cinta kepada negara dalam diri murid bermula tahun 2014. Oleh yang demikian, KPM sekali lagi ingin menegaskan bahawa tajuk berkaitan Perjanjian Malaysia (MA63) telah sedia ada dalam kurikulum mata pelajaran Sejarah di peringkat rendah dan menengah.

Sekian, terima kasih.

RJM78

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

**DARIPADA : YB TUAN YUSUF BIN ABD. WAHAB
(TANJONG MANIS)**

TARIKH : 6 NOVEMBER 2019

SOALAN

TUAN YUSUF BIN ABD. WAHAB [TANJONG MANIS] minta **MENTERI DALAM NEGERI** menyatakan langkah-langkah dan program-program pencegahan kes-kes melibatkan pengedaran najis dadah di Parlimen Tanjung Manis.

JAWAPAN

Tuan Yang Di Pertua,

Untuk makluman ahli Yang Berhormat dan Dewan yang mulia ini, Kementerian Dalam Negeri amat memandang serius gejala penyalahgunaan dadah dalam masyarakat dan melaksanakan pelbagai langkah pencegahan dan pemuliharaan dadah.

Bagi mencegah pengedaran dadah di Malaysia termasuk di Parlimen Tanjung Manis, Polis Diraja Malaysia (PDRM) mengambil beberapa tindakan, iaitu melaksanakan operasi mengesan pengedar dan pengguna dadah secara berterusan, menjalankan kerjasama dengan agensi-agensi lain serta mengadakan ceramah dan pameran berkaitan dadah kepada masyarakat bagi menyalurkan maklumat dan memberi kesedaran mengenai kemudaratannya kepada masyarakat.

SOALAN NO : 36

Pada tahun 2018, terdapat sebanyak 9 kes pemilikan dadah yang melibatkan 14 orang tangkapan di kawasan Parlimen Tanjong Manis manakala pada tahun 2019 sehingga kini, jumlah kes pemilikan ialah sebanyak 4 kes yang melibatkan 7 orang tangkapan.

Selain tindakan mencegah pengedaran dadah, program-program pendidikan pencegahan turut dilaksanakan. Sehingga bulan Jun 2019, Agensi Antidadah Kebangsaan (AADK) telah menjalankan program pendidikan pencegahan di bawah Institusi Pendidikan Bebas Dadah iaitu Sayangi Hidup Elak Derita Selamanya (SHIELDS) di Parlimen Tanjong Manis. Program ini bertujuan untuk meningkatkan kesedaran dan mengupayakan ketahanan diri murid (lingkungan umur 13 hingga 18 tahun) yang dikenal pasti berisiko terlibat dalam penyalahgunaan dadah. Antaranya, AADK telah menjalankan ujian urin ke atas 20 orang pelajar dari SMK Belawai dan hasil saringan tersebut telah mendapati tiada pelajar yang positif.

Selain itu, program Tempat Kerja Bebas Dadah (TEKAD) juga dilaksanakan ke arah mencapai sasaran untuk menjadikan diri dan tempat kerja bebas daripada dadah serta mengetahui tentang perkhidmatan rawatan dan pemulihan yang disediakan oleh AADK. Antara pengisian di bawah program ini ialah sesi dialog antara AADK, majikan dan pekerja, slot pameran, rondaan dan ujian urin. Sebanyak 3 premis yang telah dipilih, iaitu:

- i. Tanjong Manis Development Sdn. Bhd. yang diadakan pada 29 Januari 2019 dengan penglibatan seramai 32 orang peserta,
- ii. Jabatan Perpaduan Bahagian Sarikei yang diadakan pada 21 Mac 2019 dengan penglibatan seramai 60 orang peserta; dan
- iii. Balai Bomba dan Penyelamat Tanjong Manis yang diadakan pada 27 Jun 2019 dengan penglibatan seramai 20 orang peserta.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KE EMPAT BELAS**

PERTANYAAN : LISAN

DARIPADA : TUAN CHAN MING KAI [ALOR SETAR]

TARIKH : 6 NOVEMBER 2019 (RABU)

SOALAN

Minta **MENTERI PERTANIAN DAN INDUSTRI ASAS TANI** menyatakan

- (a) Manakah klinik veterinar Kerajaan yang menjalankan khidmat pengkasan bagi anjing dan;
- (b) Apa sebabnya terdapat klinik veterinar yang tiada perkhidmatan tersebut dan adakah perkhidmatan pengkasan boleh dilakukan ke atas anjing liar

JAWAPAN

Yang di-Pertua,

1. Pengkasian haiwan merupakan proses pembuangan organ seks jantan haiwan bagi mengawal populasi dan mengurangkan jumlah anjing dan kucing terbiar. Khidmat pengkasian boleh didapati di 16 buah Klinik Veterinar Kerajaan di Semenanjung (tidak termasuk di Sabah dan Sarawak).
2. Khidmat pengkasian terutama bagi anjing adalah terhad di Klinik Veterinar Kerajaan tersebut kerana ianya mempunyai kepakaran dalam prosedur pembedahan bagi tujuan pengkasian anjing, mempunyai peralatan dan kakitangan yang mencukupi, dan ruang operasi pembedahan yang bersesuaian.
3. Walau bagaimanapun, perkhidmatan pengkasian bagi anjing liar yang terbiar tidak ditawarkan di Klinik Veterinar Kerajaan kerana dikhuatiri boleh memberikan kesan negatif kepada kesihatan haiwan-haiwan peliharaan lain di klinik tersebut. Namun demikian, Jabatan Perkhidmatan Veterinar sentiasa menawarkan perkhidmatan rawatan asas bagi memastikan kesihatan haiwan peliharaan dan kebajikannya sentiasa berada pada tahap yang terbaik.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI HAJAH NANCY SHUKRI
[BATANG SADONG]**

TARIKH : 6 NOVEMBER 2019 (RABU)

SOALAN NO. 38

Minta **MENTERI PENDIDIKAN** menyatakan sama ada Kementerian berhasrat untuk membetulkan sukatan buku teks Sejarah berkaitan pembentukan Malaysia oleh Sabah, Sarawak dan Singapura pada 16 September 1963.

JAWAPAN

Tuan Yang di-Pertua,

Penulisan buku teks Sejarah Kementerian Pendidikan Malaysia (KPM) adalah mengikut keperluan tajuk/tema yang terdapat dalam Dokumen Standard Kurikulum dan Pentaksiran (DSKP) yang disediakan oleh Bahagian Pembangunan Kurikulum (BPK), KPM. Buku teks ditulis mengikut perkembangan kurikulum semasa dan telah dirujuk kepada Panel Pakar Rujuk Kurikulum Sejarah dan Buku Teks Sejarah yang sentiasa memastikan kesahihan fakta dan sesuatu peristiwa sejarah. KPM sentiasa mengambil perhatian dalam penulisan tentang Pembentukan Malaysia dengan merujuk kepada saranan dalam Perjanjian Malaysia 1963 (MA63).

Setakat ini, KPM belum menerima maklumat berkaitan kesalahan fakta dalam buku teks sejarah sekolah rendah dan menengah. Sekiranya terdapat kesalahan fakta yang dikenal pasti dalam buku teks sejarah KPM, pihak yang berkenaan perlu mengemukakan bukti supaya pihak KPM dapat mengambil tindakan segera. Untuk makluman Ahli Yang Berhormat, KPM mempunyai tiga (3) mekanisma bagi memastikan semua fakta dan peristiwa sejarah yang terdapat didalam Buku Teks Sejarah KPM adalah sahih dan tepat:

1. Pelantikan 14 Panel Pakar Rujuk Kurikulum Sejarah Dan Buku Teks Sejarah KPM

Fakta sejarah dalam kandungan Kurikulum Sejarah dan Buku Teks Sejarah diteliti, disemak dan dikawal mutu kesahihannya oleh satu panel khas iaitu Pakar Rujuk Kurikulum Sejarah dan Buku Teks Sejarah KPM yang dilantik oleh Menteri Pendidikan Malaysia. Panel ini terdiri daripada pelbagai latar belakang akademik, universiti, kaum dan gender. Pembentukan panel ini bertujuan memastikan fakta sejarah negara dalam penggubalan Kurikulum Sejarah dan penerbitan Buku Teks Sejarah adalah tepat dan benar berdasarkan sumber dan bahan sejarah yang sebenar. Panel ini berfungsi untuk mengawal mutu kurikulum sejarah dan buku teks sejarah yang dihasilkan mengikut kronologi sejarah negara tanpa memesongkan

dan menokok tambah fakta sejarah. Kandungan kurikulum Sejarah dan buku teks Sejarah yang dikemukakan mencerminkan usaha pelbagai kaum yang diterajui dan diwakili oleh tokoh-tokoh tertentu untuk memperjuangkan kelangsungan negara kita berdasarkan garis masa.

2. Proses Penerbitan Yang Semakin Ketat

Proses penggubalan Kurikulum Sejarah dan penulisan buku teks Sejarah adalah sangat ketat (rigid) kerana disemak dan dikawal mutu oleh beberapa panel Jawatankuasa Penilaian dan Pemantapan yang telah melalui satu proses tapisan, pemilihan dan lantikan oleh KPM. Jawatankuasa ini terdiri daripada guru-guru cemerlang Sejarah dan pensyarah dari institut pendidikan guru dan institut pendidikan tinggi awam yang berlatar belakangkan opsyen mata pelajaran Sejarah serta terdiri daripada wakil pelbagai kaum dan zon dari seluruh negara. Proses penilaian, pemurnian dan pemantapan yang dilakukan terhadap kurikulum dan penulisan buku teks juga dilakukan beberapa kali dengan berhati-hati serta mengikut SOP penggubalan kurikulum dan SOP Penerbitan Buku Teks.

3. Sumber Berwasit, Benar Dan Tuntas

Fakta yang dijelmakan dalam buku teks sejarah KPM adalah melalui perwasitan yang ketat sebelum diterbitkan. Dokumen sejarah yang benar dari Arkib Negara dan Bahan Artifak yang tuntas dari Jabatan Muzium Negara juga dijadikan sebagai sumber rujukan lain yang mengesahkan kesahihan fakta pada Buku Teks Sejarah KPM. Selain itu, penulisan mengenai semua kaum etnik dan kepelbagaian masyarakat perlu dapat pengesahan Pejabat-pejabat Setiausaha Kerajaan Negeri. Ini adalah salah satu mekanisma bagi menjaga keharmonian, kesopanan dan kesepaduan dalam penulisan fakta sejarah, pengajaran dan pembelajaran untuk faedah dan manfaat semua rakyat Malaysia.

Sekian, terima kasih.

PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS

PERTANYAAN : LISAN

DARIPADA : TUAN TAN KOK WAI [CHERAS]

TARIKH : 6 NOVEMBER 2019 (RABU)

SOALAN

Minta **MENTERI PERTANIAN DAN INDUSTRI ASAS TANI** menyatakan import makanan setiap tahun dari 2010 hingga 2019 ikut pecahan lima negara utama dan jenis-jenis makanan dan jumlah nilai import.

JAWAPAN

Yang Dipertua,

- Untuk makluman Ahli Yang Berhormat, bagi tempoh 2010 hingga 2018 jumlah import makanan negara setiap tahun adalah antara RM30.0 bilion hingga RM50.0 bilion. Bagi tahun 2019 jumlah import makanan negara sehingga Ogos 2019 adalah sebanyak RM 34.2 bilion. Import makanan negara telah meningkat pada kadar purata 6.5% setahun daripada RM 30.0 bilion pada tahun 2010 kepada RM 50.0 bilion pada tahun 2018.
- 5 negara utama import makanan negara adalah seperti China, India, Thailand, Indonesia, dan New Zealand. Import makanan mengikut 12 kategori utama adalah seperti berikut:

	Sektor Makanan	2010	2011	2012	2013	2014	2015	2016	2017	2018	2019 (Sehingga Julai)
1	Binatang hidup	0.2	0.2	0.2	0.3	0.3	0.4	0.3	0.3	0.3	0.1
2	Daging dan sediaan daging	1.7	2.0	2.2	2.6	2.9	3.4	3.4	4.1	3.9	2.2
3	Hasil tenuku	2.0	2.5	2.7	3.3	3.9	3.5	3.1	3.9	3.8	2.4
4	Ikan, krustasea, moluska dan sediaan	2.4	2.9	3.2	3.2	3.6	3.6	3.8	4.1	4.1	2.5
5	Bijirin dan sediaan bijirin	3.6	4.3	4.1	3.8	4.1	4.7	4.3	6.4	7.1	4.3

NO SOALAN : 39

6	Sayur-sayuran	2.8	2.7	2.7	3.2	3.2	4.5	5.1	5.1	4.6	2.6
7	Buah-buahan	1.4	1.6	1.8	2.1	2.3	3.2	3.7	3.9	3.9	2.4
8	Gula, sediaan gula dan madu	2.9	3.4	3.7	3.4	3.8	3.4	4.0	4.7	3.8	2.0
9	Kopi, koko, teh dan rempah	5.0	5.6	5.2	5.1	6.3	6.5	6.7	7.0	7.0	4.5
10	Bahan makanan untuk ternakan	5.1	5.7	6.4	7.4	7.5	7.0	6.7	6.2	5.9	3.3
11	Keluaran dan sediaan makanan lain	3.0	3.4	3.8	4.3	4.6	5.2	5.5	5.6	5.7	3.4
	Jumlah Makanan	30.2	34.4	36.0	38.8	42.6	45.3	46.7	51.3	50.1	29.8

3. Manakala import makanan mengikut pecahan lima (5) negara utama adalah seperti berikut:

	2010		2011		2012		2013		2014	
	Negara	Import (RM Bilion)								
1	China	3.43	China	3.67	China	3.74	China	3.98	China	4.64
2	Indonesia	3.35	Thailand	3.31	India	3.35	Argentina	3.72	Argentina	3.79
3	Australia	2.78	Indonesia	3.01	Argentina	3.19	India	3.52	Thailand	3.75
4	Argentina	2.66	India	2.84	Thailand	3.03	Indonesia	3.20	Australia	3.44
5	Thailand	2.47	Brazil	2.80	Australia	2.97	Brazil	3.13	India	3.40
6	Negara lain	15.50	Negara lain	18.82	Negara lain	19.77	Negara lain	21.26	Negara lain	23.58
	Jumlah	30.19	Jumlah	34.45	Jumlah	36.05	Jumlah	38.80	Jumlah	42.60
<hr/>										
2015		2016		2017		2018		2019 (Jan-Julai)		
	Negara	Import (RM Bilion)								
	1	China	5.35	China	5.95	China	6.08	China	5.94	China
2	Thailand	3.98	Brazil	4.13	Brazil	4.86	Thailand	4.80	Thailand	2.84
3	Australia	3.68	Australia	3.57	Argentina	4.40	Argentina	4.41	Argentina	2.47
4	Argentina	3.67	Argentina	3.56	Thailand	3.84	Indonesia	3.47	India	2.13
5	Indonesia	3.38	Indonesia	3.55	Australia	3.67	Australia	3.44	USA	1.91
6	Negara lain	25.25	Negara lain	25.98	Negara lain	28.43	Negara lain	28.09	Negara lain	17.16
	Jumlah	45.32	Jumlah	46.75	Jumlah	51.27	Jumlah	50.15	Jumlah	29.82

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI RICHARD RIOT ANAK JAEM
[SERIAN]**

TARIKH : 6 NOVEMBER 2019 (RABU)

SOALAN NO. 40

Minta **MENTERI PENDIDIKAN** menyatakan bilangan sekolah-sekolah rendah usang atau daif di seluruh negara dan negeri Sarawak khasnya dan apakah langkah-langkah yang diambil untuk memperbaikinya.

JAWAPAN

Tuan Yang di-Pertua,

Kementerian Pendidikan Malaysia (KPM) sentiasa berusaha untuk memastikan murid-murid di negara ini menikmati ruang yang kondusif untuk mengikuti sesi pengajaran dan pembelajaran. Untuk itu, pelaksanaan program pembangunan semula sekolah daif akan terus menjadi keutamaan KPM untuk menyediakan tempat belajar yang selamat dan selesa kepada murid-murid.

Berdasarkan data KPM, projek pembangunan dan menaik taraf sekolah daif dari tahun 2016 sehingga 2019 di seluruh negara adalah sebanyak 577 buah sekolah. Di Semenanjung sahaja, pelaksanaan naik taraf dan pembangunan semula sekolah daif melibatkan 226 buah sekolah dengan peruntukan berjumlah **tiga ratus lima puluh satu juta ringgit (RM351 juta)**. Di Sarawak pula, sebanyak 198 buah sekolah telah dinaik taraf dengan peruntukan berjumlah **enam ratus tujuh puluh lapan perpuluhan sembilan tujuh juta ringgit (RM678.97 juta)** manakala di Sabah, sebanyak 153 buah sekolah daif telah dinaik taraf dengan peruntukan sebanyak **lima ratus lima puluh dua perpuluhan**

satu lima dua juta ringgit (RM552.152 juta) melalui peruntukan pembangunan dan *Private Finance Initiative* (PFI).

Bagi pelaksanaan tahun 2019, peruntukan sebanyak **sepuluh juta ringgit (RM10 juta)** telah diluluskan di negeri Sabah untuk tujuan naik taraf dan pembangunan semula bagi tiga (3) buah sekolah daif. Di Sarawak pula, peruntukan sebanyak **seratus juta ringgit (RM100 juta)** telah diluluskan untuk tujuan naik taraf dan pembangunan bagi 32 buah sekolah, manakala **lapan belas juta ringgit (RM18 juta)** telah diperuntukkan untuk tujuan naik taraf dan pembangunan bagi lapan (8) buah sekolah di Semenanjung. Kesemua projek-projek ini dilaksanakan oleh pihak Jabatan Kerja Raya (JKR) secara tender terbuka dan projek-projek ini sedang dalam pelbagai peringkat pelaksanaan.

Selain itu, Kerajaan Negeri Sarawak juga telah melaksanakan projek penyelenggaraan sekolah dalam projek *Rural Transformation Initiative* (RTI) dengan kos **dua puluh satu juta ringgit (RM21 juta)** untuk 66 sekolah yang dilaksanakan pada tahun 2018 hingga 2020 serta pembinaan sekolah baharu, iaitu SK Meludam dan SK Ulu Segan.

Untuk makluman Ahli Yang Berhormat, beberapa langkah telah diambil oleh KPM untuk memperbaiki sekolah-sekolah daif di Sarawak. Antaranya termasuklah pelaksanaan projek *Industrialized Building System* (IBS) melibatkan 20 buah sekolah pada 2016, 30 sekolah pada 2017 dan 116 buah sekolah pada tahun 2018. Pada tahun 2019, 32 buah lagi sekolah telah dirancang untuk dibaik pulih menggunakan IBS. Selain itu, KPM juga mengemukakan permohonan peruntukan kepada Kementerian Kewangan dan Kementerian Hal Ehwal Ekonomi pada setiap tahun untuk memastikan pelaksanaan menaik taraf sekolah-sekolah daif ini dapat dilaksanakan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : TUAN KARUPAIYA A/L MUTUSAMI
[PADANG SERAI]**

TARIKH : 6 NOVEMBER 2019 (RABU)

SOALAN NO. 41

Minta **MENTERI PENDIDIKAN** menyatakan Kementerian disarankan untuk meneliti dan mengkaji balik dengan lebih mendalam dan terperinci sebelum sesuatu pembaharuan dibawa masuk ke dalam sistem pembaharuan pendidikan, walaupun ianya telah diluluskan oleh pihak Kerajaan dahulu.

JAWAPAN

Tuan Yang di-Pertua,

Untuk makluman Ahli Yang Berhormat juga, Kementerian Pendidikan Malaysia (KPM) sentiasa berusaha untuk meningkatkan kecemerlangan sistem pendidikan negara seiring dengan perkembangan dunia hari ini.

KPM juga sentiasa meneliti dan mengkaji secara mendalam sesuatu pembaharuan pendidikan yang memberi impak positif kepada pembangunan negara. KPM percaya bahawa sebarang dasar-dasar baharu atau kajian semula dasar pendidikan perlu diteliti secara terperinci dan tidak dilakukan secara tergesa-gesa bagi memastikan hasrat dan objektif utama dasar tersebut terlaksana dan bermanfaat untuk semua.

Sehubungan dengan itu, beberapa proses yang akan dilaksanakan seperti kajian terperinci, penanda arasan pelaksanaan

dengan negara luar, sesi libat urus dengan *stakeholder* serta pihak-pihak berkepentingan dan juga pembentangan di Mesyuarat Pengurusan Tertinggi untuk mendapatkan pandangan serta persetujuan. Proses-proses ini dilaksanakan bagi memastikan bahawa sesuatu dasar yang akan dilaksanakan ada bersifat komprehensif dan inklusif, adil serta mampu memacu sistem pendidikan negara ke arah kecemerlangan.

Oleh itu, antara usaha yang telah dilaksanakan oleh KPM ialah menubuhkan Jawatankuasa Kajian Dasar Pendidikan Negara (JKDPN) yang dianggotai oleh pakar daripada kalangan ahli pendidik, badan bukan kerajaan dan pakar agama bagi meneliti dasar pendidikan negara secara holistik dan komprehensif. Jawatankuasa ini bertujuan untuk mengkaji semula dan mengemukakan laporan perakuan dasar untuk menambah baik sistem pendidikan negara di peringkat prasekolah hingga ke peringkat universiti. Laporan akhir JKDPN telah diserahkan kepada KPM pada akhir bulan April 2019 lalu. Semua syor yang dikemukakan oleh JKDPN sedang diteliti secara terperinci melalui siri makmal serta perbincangan umum yang akan dilaksanakan selanjutnya selepas ini oleh KPM. Siri makmal serta perbincangan umum yang sedang dilaksanakan ini akan memberi peluang kepada semua pemegang taruh berkaitan untuk meneliti semua syor ini terutamanya daripada aspek kebolehlaksanaan.

Sekian, terima kasih.

RJM79

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : TUAN WONG KAH WOH [IPOH TIMUR]
SOALAN : 6 NOVEMBER 2019 (RABU)

SOALAN NO. 42

Minta **MENTERI TENAGA, SAINS, TEKNOLOGI, ALAM SEKITAR DAN PERUBAHAN IKLIM** menyatakan adakah Kementerian mempunyai rancangan untuk membangunkan teknologi aeroangkasa terutamanya pembangunan satelit.

JAWAPAN

Tuan Yang di-Pertua,

Untuk makluman Ahli Yang Berhormat,

Teknologi satelit merupakan salah satu teknologi angkasa yang melangkaui ruang aeroangkasa iaitu ruang yang bermula daripada ketinggian 100km dari aras laut sehingga infiniti.

Kerajaan Malaysia Baharu bercadang untuk meneruskan program pembangunan satelit negara khususnya satelit penderiaan jauh yang akan diterajui oleh Agensi Angkasa Malaysia (MYSA). MYSA adalah entiti baru hasil penggabungan dua agensi iaitu Agensi Remote Sensing Malaysia (ARSM) dan Agensi Angkasa Negara (ANGKASA). Usaha ini akan memperkasakan pemilikan data strategik demi memelihara

kedaulatan negara berasaskan teknologi satelit sejajar dengan Dasar Angkasa Negara 2017 - 2030.

Program pembangunan satelit penderiaan jauh negara akan dilaksanakan melalui beberapa kaedah termasuk melalui kerjasama pihak swasta dengan penekanan kepada pembangunan dan penggunaan kepakaran tempatan. Skop program adalah meliputi pengenapastian teknologi, rakan strategik, latihan, pemindahan teknologi serta pengoperasian dan kawalan misi satelit.

Jemaah Menteri pada 14 Ogos 2019 telah bersetuju supaya pembangunan satelit penderiaan jauh negara diteruskan tetapi dilaksanakan secara *Request for Proposal* kepada pihak swasta dengan memastikan adanya *local content* bagi membangun kapasiti dan kemahiran dalam industri pembangunan satelit. *RFP* ini akan dijalankan oleh MySA yang telah diberi mandat untuk mewakili Kerajaan dalam pembangunan satelit baharu.

Untuk makluman ahli-ahli Dewan,

Antara perkembangan industri pembangunan satelit antarabangsa merupakan program model *space constellation*, di mana negara-negara atau syarikat-syarikat boleh menyertakan satelit penderiaan yang dimiliki sendiri sambil memanfaatkan data daripada satelit-satelit lain tertakluk kepada syarat penyertaan. Pendekatan ini mempunyai kelebihan dari segi perkongsian infrastruktur, hak ke atas satelit milik negara, kepelbagaiannya resolusi data yang diterima dalam masa sebenar serta potensi mengelakan sebarang *disruption, breaks* dan *data blocks* ke atas data.

Pada masa kini Kerajaan membelanjakan kira-kira RM20 juta setahun untuk melanggan perkhidmatan imej dan data satelit asing bagi kegunaan agensi kerajaan. Oleh itu, dalam usaha mengoptimumkan perbelanjaan, Kerajaan hendak menggunakan kaedah RFP untuk membuka peluang kepada pemain-pemain industri membida bagi membangunkan satelit penderiaan jauh dan membekalkan data keperluan. Dengan cara ini, Kerajaan dapat menjamin perbelanjaan yang ketara dengan keperluan

data sambil membuka peluang kepada tenaga mahir sedia ada bagi menyumbang kepada pembangunan negara.

Model RFP yang kini dicadang adalah untuk membina satelit penderiaan jauh bersaiz kecil (50 ke 60kg), beresolusi 1 meter dengan anggaran kos RM110 juta yang merangkumi kos pembinaan, pelancaran dan insuran. Kos ini akan ditanggung oleh pembida yang berjaya melalui RFP tersebut dan pulangan kepada pembida akan diperolehi melalui *off take subscription* oleh Kerajaan serta kebolehan mengkomersialkan penggunaan satelit tersebut dan data lain yang tidak dilanggar oleh kerajaan kepada pelanggan lain tertakluk kepada syarat RFP bagi.

Untuk perbandingan, program RazakSat-2 yang dicadang oleh kerajaan terdahulu telah melihat peningkatan kos dari mulanya RM200.8juta pada Disember 2010 kepada RM367.4 juta pada Februari 2018. Oleh itu, Jemaah Menteri pada 14 Ogos 2019 juga telah bersetuju untuk menamatkan program RazakSat-2 dan program pembangunan satelit hanya akan dijalankan melalui model RFP ini bersama pihak swasta.

Perincian RFP ini sedang diteliti oleh Kementerian susulan daripada keputusan Jemaah Menteri pada 14 Ogos 2019.

Pelaksanaan program ini akan disokong oleh infrastruktur teknologi angkasa milik MYSA yang komprehensif iaitu 2 stesen bumi utama bagi mengawal dan menerima data satelit penderiaan jauh di Sungai Lang, Banting, Selangor dan di Temerloh, Pahang. MYSA juga sedang dalam proses menyiap dan melengkapkan fasiliti sedia ada bagi keperluan kerja-kerja *Assembly, Integration and Test* (AIT) satelit di Banting. Ini menjadikan Malaysia sebuah Negara yang mempunyai peralatan yang hampir lengkap bagi meneruskan penguasaan dan pembangunan teknologi angkasa di rantau ini dengan penglibatan rakyat dan industri tempatan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN

**DARIPADA : PUAN KASTHURIRAAANI A/P PATTO
[BATU KAWAN]**

TARIKH : 6 NOVEMBER 2019 (RABU)

SOALAN NO. 43

Minta **MENTERI PERTANIAN DAN INDUSTRI ASAS TANI** menyatakan apakah kemudahan yang disediakan dari segi modal, geran atau pinjaman daripada Kerajaan untuk penduduk Parlimen Batu Kawan bergiat dalam industri pertanian dan perikanan terutama sekali bagi wanita dan anak muda di kawasan bandar dan luar bandar serta bantuan untuk mereka menjana pendapatan dengan penceburan dalam bidang ini.

JAWAPAN

Yang di-Pertua,

1. Kerajaan melalui Kementerian Pertanian dan Industri Asas Tani sentiasa peka dalam membantu golongan petani sedia ada mahupun petani yang baharu menceburkan diri meliputi golongan belia muda dan wanita.
2. Kementerian Pertanian dan Industri Asas Tani melalui Unit Agropreneur Muda (UAM) telah memperkenalkan Program Agropreneur Muda (PAM) di bawah Rancangan Malaysia Ke-11 (RMKe-11) yang bermula pada tahun 2016. Program ini diwujudkan bagi tujuan menarik minat anak muda dan wanita di seluruh negara termasuklah di kawasan Parlimen Batu Kawan yang berumur di antara 18 hingga 40 tahun untuk menceburi sektor agromakanan.
3. Melalui PAM, golongan muda ditawarkan bantuan geran dan pembiayaan. Selain itu, PAM juga menawarkan bantuan khidmat nasihat teknikal, rundingan serta latihan bagi membangunkan projek-projek pertanian berdasarkan keperluan pemohon seperti berikut:
 - a) menyediakan Geran Agropreneur Muda (GAM) berbentuk barang sehingga RM20,000 bagi setiap projek;
 - b) menyediakan bantuan modal melalui Pakej Pembiayaan Khas sehingga RM200,000 bagi projek pengembangan; dan
 - c) menyediakan kursus jangka pendek dan khidmat nasihat teknikal dan kewangan melalui jabatan/agensi berkaitan di bawah Kementerian Pertanian dan Industri Asas Tani.
4. Di samping itu, Kementerian Pertanian dan Industri Asas Tani juga menyediakan Program Geran Pemadanan dalam industri asas tani seperti berikut:
 - a) Program *High Impact Product (HIP)* iaitu bantuan peruntukan 50% pembiayaan Kerajaan manakala 50% adalah dibiayai

oleh usahawan dengan nilai maksimum geran sebanyak RM200,000; dan

- b) Program *Change Upgrade Product (CUP)* iaitu bantuan peruntukan yang disalurkan melalui 70% pembiayaan Kerajaan manakala 30% dibiayai oleh usahawan dengan nilai maksimum geran sebanyak RM60,000.
5. Program ini menyediakan bantuan yang meliputi skop seperti berikut:
- (i) kajian nutrisi dan jangka hayat produk;
 - (ii) reka bentuk pembungkusan dan pelabelan;
 - (iii) peningkatan kapasiti pengeluaran melalui perolehan mesin dan peralatan;
 - (iv) penambahbaikan premis bagi memenuhi keperluan persijilan; dan
 - (v) perolehan papan tanda perniagaan.

6. Jumlah Geran Pemadanan yang diluluskan bagi Pulau Pinang pada tahun 2018 dan 2019 adalah sebanyak RM0.73 juta melibatkan 19 syarikat/ usahawan. Program ini telah membantu pengusaha-pengusaha Industri Kecil dan Sederhana (IKS) untuk menyediakan produk-produk yang memenuhi syarat, kriteria dan pensijilan yang diperlukan untuk pasaran dalam dan luar negara.

7. Kementerian Pertanian dan Industri Asas Tani turut menawarkan kemudahan pembiayaan mikro Agro Nisaa'i melalui Agrobank kepada usahawan tani untuk menjalankan perniagaan berasaskan pertanian dan industri asas tani. Program pembiayaan ini menawarkan pembiayaan sehingga RM30,000 dengan margin pembiayaan sehingga 100%. Program pembiayaan ini disediakan khusus untuk usahawan wanita tanpa memerlukan cagaran dengan kadar pinjaman yang dikenakan serendah 3%.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KE TIGA, PENGGAL KE DUA,
PARLIMEN EMPATBELAS**

PERTANYAAN : JAWAB LISAN

DARIPADA : YB TUAN KARUPAIYA A/LMUTUSAMI (PADANG SERAI)

TARIKH : 6 NOVEMBER 2019

SOALAN

TUAN KARUPAIYA A/L MUTUSAMI [PADANG SERAI] minta **MENTERI DALAM NEGERI** menyatakan Kementerian harus menguatkuasakan undang-undang yang lebih tegas dan memberi kuat kuasa sepenuhnya kepada pihak polis untuk mengambil langkah-langkah dan tindakan ke atas orang awam yang meletupkan mercun menggunakan tanda-tanda gangsterisme, bermain judi dan minum arak. Gejala ini perlu dihentikan dengan segera supaya tidak menjelaskan masyarakat dan generasi muda akan datang.

JAWAPAN

Tuan Yang Di Pertua,

Larangan bermain mercun sepetimana diputuskan Mesyuarat Jemaah Menteri pada 18 Januari 2012 masih berkuatkuasa dan dikekalkan. Walau bagaimanapun, sebarang kelonggaran terhadap larangan tersebut seperti penganjuran acara, majlis atau pertunjukan tertentu adalah tertakluk kelulusan oleh Kementerian Dalam Negeri (KDN). Dalam hal ini, permit dikeluarkan oleh pihak Polis Diraja Malaysia mengikut peruntukan di bawah Akta Bahan Letupan 1957 dan Peraturan di dalam *Explosives Rules 1923*.

Sebarang penyalahgunaan mercun akan diambil tindakan di bawah Akta Bahan Kakisan, Letupan dan Senjata Berbahaya 1958, Akta Bahan Letupan 1957 dan Akta Kesalahan Kecil 1955. Pihak polis tidak teragak-agak untuk mengambil tindakan sebagaimana diperuntukkan undang-undang berkaitan isu ini. Tindakan penguatkuasaan, pengawalan dan pemantauan sentiasa diperketatkan bukan sahaja kepada pembeli atau pengguna, tetapi juga kepada pengimport dan penjual bunga api.

Sekiranya terdapat sebarang unsur-unsur gengsterism dikesan, pihak polis akan mengambil tindakan berdasarkan bukti yang diperolehi dalam penyiasatan. Pendakwaan akan dibuat terhadap mana-mana individu yang terbabit dengan kumpulan jenayah atau keganasan tanpa mengira latar belakang, kaum, agama mahupun fahaman politik.

**PEMBERITAHUAN PERTANYAAN LISAN
MESYUARAT KETIGA DEWAN RAKYAT, PENGGAL KEDUA
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN STEVEN CHONG SHIAU YOON
[TEBRAU]**

TARIKH : 6 NOVEMBER 2019 (RABU)

SOALAN

Tuan Steven Choong Shiao Yoon [Tebrau] minta **MENTERI PEMBANGUNAN WANITA, KELUARGA DAN MASYARAKAT** menyatakan apa sebabnya orang kurang upaya (OKU) kebanyakannya datang dari keluarga kawasan setinggan dan apakah tindakan pencegahan yang diambil oleh Kementerian untuk mengurangkan lahirnya anak OKU.

JAWAPAN

Tuan Yang di-Pertua,

Permohonan Pendaftaran Orang Kurang Upaya (OKU) dilaksanakan menurut Seksyen 22(1) Akta Orang Kurang Upaya 2008. Garis Panduan Pendaftaran OKU menetapkan bahawa pendaftaran OKU adalah secara sukarela dan hanya untuk warganegara Malaysia. Agensi yang terlibat dalam pendaftaran OKU adalah Jabatan Kebajikan Masyarakat (JKM) dan Kementerian Kesihatan Malaysia (KKM).

Pendaftaran OKU dilaksanakan di setiap Pejabat Kebajikan Masyarakat Daerah (PKMD) dan terbuka kepada semua golongan masyarakat termasuk golongan yang tinggal di kawasan setinggan. Tiada bukti menerusi sebarang kajian yang menyatakan penduduk yang tinggal di kawasan setinggan yang ramai berdaftar sebagai OKU. Anggaran pihak Pertubuhan Kesihatan Sedunia (WHO) menyatakan 15% penduduk sesebuah negara adalah OKU secara umum meliputi seluruh negara termasuk kawasan bandar, luar bandar, setinggan, kampung, ladang, perkampungan orang asli dan sebagainya.

Menurut Sistem Maklumat Orang Kurang Upaya (SMOKU) sehingga Jun 2019 seramai **549,554** OKU telah berdaftar dengan Jabatan Kebajikan Masyarakat.

Menurut Kementerian Kesihatan Malaysia (KKM), program pencegahan masalah ketidakupayaan dilaksanakan semenjak tahun 1980-an melalui perkhidmatan promosi dan pendidikan kesihatan, saringan kesihatan ibu dan anak serta pengesanan dan intervensi awal masalah ketidakupayaan.

Bagi tujuan mengurangkan lahirnya anak OKU, fokus bermula dengan penjagaan kesihatan ibu hamil. Ia merangkumi penjagaan dan pemantauan kesihatan ibu dan bayi dalam kandungan sepanjang kehamilan, semasa bersalin dan selepas kelahiran serta menjamin kelahiran selamat. Antaranya adalah aktiviti pemberian vitamin asid folik bagi membantu melindungi bayi daripada masalah kecacatan saraf

tunjang (*Neural Tube Defect*) seperti kecacatan *Spina Bifida*, pemberian imunisasi ATT (*Anti Tetanus Toxoid*) kepada ibu hamil untuk mengelakkan jangkitan tetanus dan menyebabkan kejadian *Tetanus Neonatorum* dalam kalangan bayi, ujian VDRL/TPHA bagi mengesan awal masalah *Congenital Syphilis*, kawalan penyakit darah tinggi semasa mengandung bagi mengelakkan kelahiran pra matang dan komplikasi lain serta menggalakkan amalan cara hidup sihat seperti menjauhi rokok dan alkohol yang boleh menyebabkan bayi kecil (*Intrauterine Growth Restriction*).

Bayi baharu lahir dilakukan pemeriksaan fizikal dan kesihatan bagi mengenal pasti masalah ketidakupayaan yang jelas seperti *Down Syndrome*, supaya boleh dilakukan intervensi awal dalam mengurangkan kesan ketidakupayaan. Semua bayi ini juga diperiksa paras G6PD (*glucose-6-phosphate dehydrogenase deficiency*) bagi mengesan awal masalah jaundis (kuning) yang boleh menyebabkan *Kernicterus* yang akan berakhir sebagai kes *Cerebral Palsy*. Bayi juga disaring paras hormon tiroid bagi mengesan awal *Congenital Hypothyroidism* yang boleh menyebabkan masalah intelek. Selain dari itu, bayi dan kanak-kanak disaring bagi mengenal pasti tahap pertumbuhan dan perkembangan kanak-kanak, masalah pendengaran dan penglihatan dan tanda awal masalah tingkahlaku menggunakan *Modified Checklist for Autism in Toddlers* (M-CHAT).

Walau bagaimanapun, Kementerian berpandangan keadaan kurang upaya (*disability*) tidak seharusnya dilihat seolah-olah suatu wabak yang memerlukan pencegahan. Kita seharusnya menerima OKU sebagai sebahagian daripada masyarakat. Konsep inklusif perlu difahami dan dihayati oleh semua pihak. Kita seharusnya membantu OKU ke arah pemerkasaan dan pendayaupayaan agar pembangunan OKU berlangsung secara menyeluruh.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KETIGA, PENGGAL KEDUA,
PARLIMEN EMPAT BELAS**

PERTANYAAN : JAWAB LISAN

DARIPADA : YB TUAN RAMKARPAL SINGH A/L KARPAL SINGH (BUKIT GELUGOR)

TARIKH : 6 NOVEMBER 2019

SOALAN

TUAN RAMKARPAL SINGH A/L KARPAL SINGH [BUKIT GELUGOR] minta **MENTERI DALAM NEGERI** menyatakan sama ada bilangan anggota polis di Balai Polis Bandar Baru Lebuhraya Thein Teik Ayer Itam akan dinaikkan memandangkan bilangan terkini adalah hanya 38 anggota yang berkhidmat untuk kawasan Bandar Baru Ayer Itam yang mempunyai jumlah penduduk lebih kurang 300,000 orang.

JAWAPAN

Tuan Yang Di Pertua,

Pada masa ini, Kementerian Dalam Negeri (KDN) melalui Polis Diraja Malaysia (PDRM) masih tiada perancangan untuk menambah perjawatan di Balai Polis Bandar Baru Lebuhraya Thein Teik Ayer Itam. Ini kerana, pengukuhan perjawatan hanya akan diutamakan ke atas 471 balai-balai polis yang mempunyai bilangan perjawatan kurang dari 15.

Walau bagaimanapun, sekiranya terdapat keperluan mendesak dan justifikasi yang kukuh bagi penambahan perjawatan di Balai Polis Bandar Baru Lebuhraya Thein Teik Ayer Itam, satu kajian secara menyeluruh akan dilaksanakan oleh KDN melalui PDRM dengan menggunakan kaedah penempatan semula (*redeployment*) atau tukar ganti (*trade off*) bagi penambahan perjawatan di balai polis tersebut.